

妙法蓮華經授手卷第七之一

極六

清楚衡雲峯沙門智祥集

妙音菩薩品第二十四

品節云此品正顯法華三昧實證八地平地真如已從此得進證九地發真如大用

極六

色心自在得如幻三昧居法師位至等覺則分身說法故特以妙音名也如來於此放肉髻白毫二光者髻乃頂相表果毫以表因由今因果契證故以二光表之也藏識盡淨故國名淨光淨智契果故佛號淨華宿王智也況此地菩薩妙契佛心因供佛而得恒沙三昧以果會因所以釋迦光照其身從體起用故願往娑婆以無作妙力作諸佛事故不起於座以三昧力化作衆寶蓮華意顯復作真因也由此地菩薩

淨智妙圓能轉塵勞而為妙行故與八萬四千菩薩圍遶而來以因契果故問訊世尊妙契法身故相見多寶然此經以智立體初因文殊發起是以果覺為本因心今既證真如而復見文殊乃始本契合而因果冥符所以能現身說法也宜矣更須知所現之身乃覺法自性意生身也與後觀音應身不同此由出入三昧故有往來之象若夫觀音普門示現則靡不周徧觀者應須知此要解云妙音者深體妙法能以妙音隨應演說而流通是道者也名雖妙音實彰妙行觀其往昔植因於雲雷音王佛所獻樂奉鉢新在妙音說法妙行隨應故報生宿王智佛國果能有是神力今使學者體其妙行而隨應說法闡揚斯道故

說妙音品爲妙行流通夫體妙音則不滯
言詮能隨應則不局心迹不滯不局所以
爲妙行也繼此復有圓行常行而次前苦
行者將欲以行成德必精心苦志然後造
妙造妙然後能圓能圓然後真契也

釋六

⑤二明妙音來往勵受學弟子以廣流通
分六

⑥一放光東召

爾時釋迦牟尼佛放大人相肉髻光明及放
眉間白毫相光徧照東方百八萬億那由他
恒河沙等諸佛世界過是數已有世界名淨
光莊嚴其國有佛號淨華宿王智如來應供
正徧知明行足善逝世間解無上士調御丈
夫天人師佛世尊爲無量無邊菩薩大眾恭
敬圍遶而爲說法釋迦牟尼佛白毫光明徧

照其國

爾時者如來說藥王本事之後欲召妙音
來此之時從此至文殊問佛是何因緣先
現此瑞止皆是經家結集之文佛於此特
放肉髻光者以彼淨光莊嚴國中佛身六
百八十萬由旬菩薩之身四萬二千由旬
雖身量如此總不出如來大人相光又是
佛欲以菩薩所證大果而示於人也放眉
間光者欲以菩薩所修大因而示人也前
一光照東方萬八千世界是欲使守寂聲
聞破陰界也今此二光照東方百八萬億
那由他恒河沙等諸佛國土是欲持經菩
薩破盡塵沙無明方得到淨光莊嚴世界
成一真法界也佛號淨華宿王智者乃是
淨除法愛方得行無所染智無所著成法

釋六

三

身智佛也釋迦牟尼光照其國一是表極果同證一是顯世尊之光遠大不可思議天台云大人相者大相海也遍體毛功德不及一好功德衆好功德不及一相功德諸相從下向上展轉相勝不及白毫功德白毫不及肉髻功德今放最上頂光召本弟子以明最極妙法也此肉髻相從孝順師長而得白毫從一道清淨而得今放此光所以令弘此法也問佛有弟子布滿十方何故但放光召東方妙音說西方觀音而不論八方耶答此有所表淨名云日月何意行閻浮提欲以光明除衆暗瞋東是光始西是其終有始有終者其唯聖人平未發心者令其發心未究竟者令其究竟一菩薩既爾諸衆亦然一方既爾諸方亦

然聖不煩文舉一蔽諸故但言東西耳
二奉命西來分二④一發來緣又五⑤一經家叙福慧

爾時一切淨光莊嚴國中有一菩薩名曰妙音久已植衆德本供養親近無量百千萬億諸佛而悉成就甚深智慧

爾時下叙淨光莊嚴之佛國無數故曰一切有一下謂彼一切國中皆有一妙音身為當機也前段但叙妙音所居之國所事之師此處正叙妙音也植德既久供佛既多則其福備可知福既備而慧斯廣故曰成就甚深智慧也

釋六

得妙幢相三昧法華三昧淨德三昧宿王戲三昧無緣三昧智印三昧解一切衆生語言三昧集一切功德三昧清淨三昧神通遊戲

三昧慧炬三昧莊嚴王三昧淨光明三昧淨藏三昧不共三昧日旋三昧得如是等百千萬億恒河沙等諸大三昧

妙樂云三昧屬定對慧名福尚異三教豈同世有又此十六並是法華三昧異名得字通冠一十六句即證得也知音云此亦福慧兩足所致下經文自有一十六節而解俾見三昧之實不然此中徒訓字面於義無涉此十六爲首其餘三昧尚多故以等字言也要解云三昧此云正定亦名正受謂正定中受用之法也妙幢相者摧邪表正而不住相也補註云三千體寂豎超一切無相而相名妙幢相法華三昧者深入一乘證諸實相也淨德三昧者衆德真淨物莫能染也宿王戲者本智自在無所

釋六

五

滯著宿王乃月之異名權智照機善巧逗會故無緣則照而常寂不緣生法偏小之慈不緣而緣緣於平等大慈故智印則參合萬法一心三智印一切法故解一切語言者謂了皆真說集一切功德者謂萬德圓備大品經云住是三昧能集諸三昧功德故清淨三昧者纖塵不立也六根無染互用自在故神通遊戲者變現自在也化物自在遊諸世間猶如兒戲故慧炬以能破痴暗平等大慧如炬除暗故莊嚴王以總攝妙行性具萬德緣了莊嚴融通自在故淨光明者得妙智明大品經云住是三昧不得諸三昧垢又悲華經云於諸法中不見有垢故淨藏者得法眼藏一念淨心具足權實功德含攝一切故不共者謂二

乘不及也日旋者則大千圓照實智依空而不住空故得如是等恒沙三昧謂交徹融攝重重無盡皆妙音所具也由具此故能成妙行而流通妙法也

④二被照辭本師

釋迦牟尼佛光照其身即白淨華宿王智佛言世尊我當往詣娑婆世界禮拜親近供養釋迦牟尼佛及見文殊師利法王子菩薩藥王菩薩勇施菩薩宿王華菩薩上行意菩薩莊嚴王菩薩藥上菩薩

妙音之來爰沸所命若非如來光及則娑婆無從往矣故知妙音來往咸在光中雖曰過百八萬億那由他恒河沙世界而實不出此一光則妙音乃一光中之本有也此中提出釋迦牟尼光照其身一句正使

極六

六

人知有所本而人多忽之其誰咎歟妙音既作而白主乃妙行將興從體作用也既曰往詣曰親近是不動而動曰供養釋迦是行復歸體也妙音之來圓行已成而又曰見文殊者乃智行成就也藥王見行能徧治勇施表萬行繁興宿王華即如如之體用莊嚴王乃妙行之真修以無上行徧濟衆生其藥上矣此妙音辭主之本志也

⑤三師誠勿輕想

爾時淨華宿王智佛告妙音菩薩汝莫輕彼國生下劣想善男子彼娑婆世界高下不平土石諸山穢惡充滿佛身卑小諸菩薩衆其形亦小而汝身四萬二千由旬我身六百八十萬由旬汝身第一端正百千萬福光明殊妙是故汝往莫輕彼國若佛菩薩及國土生

下劣想

此本師誠命乃勵行專精也天台云然妙音乃法身大士故不肅而成至此見穢寧生劣想或恐未達者故寄彼而規此耳夫佛身與理相稱不得見卑小而忘尊嚴此約如來座爲誠也且師及弟子智斷具足師既施權資當隱實此約如來衣爲誠也然依報爲正報所感如來慈臨大千宜須高須下勿觀依而忽正此約如來室爲誠也△動相既興事作無際故臨行而本師誠重也況如來放光本爲勵弟子之真修懸發妙音以唱流通而流通妙法則人不可簡尊卑而處不可言高下淨穢之情不念人我之心便起自行不圓焉能廣益故智佛誠曰莫輕善男子下別釋莫輕依報

佛身下別釋莫輕正報而汝身下用彼顯此是故如來現大人相智佛說大人相總欲大小俱忘而流通始克也⑤四受旨承師力

妙音菩薩白其佛言世尊我今詣娑婆世界皆是如來之力如來神通遊戲如來功德智慧莊嚴

本師以莫輕依正爲示而妙音謂我今詣娑婆近釋迦見文殊等非我之力乃如來力也是我今日之行無非承如來神通遊戲而行既得佛遊戲何高下不平之入吾目即我身四萬二千田旬亦皆如來功德智慧所莊嚴也既得佛智慧莊嚴又何彼佛菩薩形相卑小之翳我心哉須知此如來二字乃妙音能入娑婆之本領所以現

種種形說種種法亦皆不離此如實中事也

⑤五正現發來相分六⑥一遣蓮華至

於是妙音菩薩不起於座身不動搖而入三昧以三昧力於耆闍崛山去法座不遠化作

葉六

八萬四千衆寶蓮華閻浮檀金爲莖白銀爲

葉金剛爲鬚甄叔迦寶以爲其臺

知音云此節叙妙音來儀釋第一妙幢相

三昧也以妙即妙心幢有催邪輔正功能

故以蓮華而表相也於是下標起入三昧

之式明妙音與釋迦以法身相見所謂不

動而昇塵刹俱徧也故華嚴云菩薩在一

佛國聞法受持其身不動以三昧力於不

可說佛會中在在現身亦不起定各各出

生不可說三昧身如是次第一切諸刹不

可窮盡是也以三昧下謂妙幢相三昧之

力能即遠而近故隔百八萬億那由他恒

沙界外於靈鷲法座不遠而能現寶蓮華

也華以八萬四千言者一則擴此心之量

而合法門之數一則見妙音法屬如是之

多也閻浮下叙其華相西域閻浮河畔有

此檀樹滴水入地土成金色他金入類失

色如墨此其最勝者金剛者以金成剛具

堅利二義堅則物不能壞利則能壞一切

也甄叔迦此云鸚鵡嘴西域記云有甄叔

葉六

九

迦樹其華赤色大如手此寶似之臺即蓮

華中臺也然妙音將來先現此相正相應

此經也故下節文殊問何緣而有此瑞佛

答以聽法華故其旨可了⑦二文殊問瑞

爾時文殊師利法王子見是蓮華而白佛言

世尊是何因緣先現此瑞有若干千萬蓮華
閻浮檀金爲莖白銀爲葉金剛爲鬚甄叔迦
寶以爲其臺

文殊見相發問所以啟妙音之來意以便
發妙音之所蓄也④三如來酬答

爾時釋迦牟尼佛告文殊師利是妙音菩薩
摩訶薩欲從淨華宿王智佛國與八萬四千
菩薩圍遶而來至此娑婆世界供養親近禮
拜於我亦欲供養聽法華經

知音云此節雖問答上節其實即以妙幢
相三昧而示法華三昧也△然文殊爲諸
人顯示以發問者明法華三昧非根本智
不能究竟

④四文殊請見

文殊師利白佛言世尊是菩薩種何善本修

何功德而能有是大神通力行何三昧願爲
我等說是三昧名字我等亦欲勤修行之行
此三昧乃能見是菩薩色相大小威儀進止
惟願世尊以神通力彼菩薩來令我得見

○此節即法華三昧致申問答示第三淨
德三昧也然淨即法身本來無染德即報
化且色相威儀皆法身中本具之功德也
文殊問種何善本者欲爲人顯出法身清
淨即諸善之本也問修何功德者亦不離
此淨法身所起之行而成功德也而能有
是神通者即具如上善根功德始能即遠
而近即無而有現諸蓮華而成此神通也
文殊又問三昧名字示已欲從淨德之名
入淨德之實而修行之庶同聲相應乃能
見妙音之報化身也以色相等屬報化故

惟願下謂即菩薩之身自非佛力加被亦不能見也古云彩雲裏仙人現手把紅羅扇遮面急須著眼看仙人莫看仙人手中扇今文殊求見妙音而兼色相大小者是不唯見仙人而扇亦欲見之者也△文殊非謂已不見而必欲求見意在警覺未證此理者而進趨也言種何善根修何功德行何三昧意中多少趣向而能有是大神通力多少謹仰我等意欲勤修行之多少與致此豈文殊自明所求耶⑤五推功多寶

爾時釋迦牟尼佛告文殊師利此久滅度多寶如來當爲汝等而現其相

○文殊求佛示相佛不親命而推重多寶佛者示第四宿王戲三昧也⑥六古佛促

第六

十一

行

時多寶佛告彼菩薩善男子來文殊師利法王子欲見汝身

○淨光莊嚴與娑婆遙隔百八萬億那由他恒河沙國妙音既入定於彼此以一音召來何其易且近哉非宿王戲三昧而何△此更有說世尊不自召行者前以光召而蓮華俱現則妙音已至矣今文殊欲令更見色身若非古佛召行則色身何從可見故曰文殊師利欲見汝身然文殊欲見妙音是智非行不顯妙音欲見文殊是行非智不行也⑦二正發來分六⑧一主伴同至

於時妙音菩薩於彼國沒與八萬四千菩薩俱共發來所經諸國六種震動皆悉雨於七

寶蓮華百千天樂不鼓自鳴

○此示第五無緣三昧也△無緣者不緣一切諸所緣故若有所緣何能沒彼出此又何能使諸菩薩俱共發來又何能令華自雨地自動而衆樂自鳴耶始知無緣慈力覆群生如月影臨千澗水也

⑤二叙相登臺

是菩薩目如廣大青蓮華葉正使和合百千萬月其面貌端正復過於此身真金色無量百千功德莊嚴威德熾盛光明照耀諸相具足如那羅延堅固之身入七寶臺上升虛空去地七多羅樹諸菩薩衆恭敬圍遶而來詣此娑婆世界耆闍崛山到已下七寶臺以價直百千瓔珞持至釋迦牟尼佛所頭面禮足奉上瓔珞

種六

十三

○此示第六智印三昧也智即妙音成所作智與佛妙觀察智也印謂佛菩薩二智相印而不改易也△又智印者即妙音欲來娑婆現蓮華奉瓔珞示種種身說種種法已至令八萬四千來者俱得現一切色身三昧此界無量菩薩亦得是三昧及陀羅尼者是也所謂森羅及萬象一法之所印是菩薩下正應文殊欲見色相大小也有八種一目如青蓮天竺有青蓮其葉修長青白分明如眼之狀故也二面逾多月文語似倒宜云其面貌端正正使和合百千萬月復過於此乃爲正以百千萬月合爲一月可謂大矣而云復過於此則妙音來此四萬二千由旬之身未隱益知文殊所問色相大小豈不知之問耶三身皆金

色然金色之身唯佛乃具今菩薩有此正所以得智印三昧也四身具莊嚴此莊嚴非瓔珞等外相莊嚴乃過去所修報具無量百千功德之所莊嚴如佛莊嚴也五威德熾盛謂此菩薩慈嚴并攝如所經之國

十六

十三

地皆震動者威也天雨寶花衆樂自鳴者德也舉此餘可類推六光明照耀此非放光乃紫金身中所有之常光也七諸相具足既曰諸相又曰具足則應有三十二相八十種好不然何謂具足八色身堅固凡色身多皆敗壞而此菩薩之身如那羅延肇法師云那羅延天力士名端正殊妙勇健無比而身極堅固也入七寶臺下觀而來詣此等三句此臺非向所現八萬四千之蓮華臺也況前曰甄叔迦此言七寶或

妙音於彼國沒與諸菩薩所乘之七寶臺故曰詣此娑婆也前曰入臺後曰下臺足見文殊問威儀進止益明矣以價下明以至重之寶而供至尊之佛即表以法寶嚴法身也正應世尊答文殊語謂供養親近禮拜於我也凡此所有皆不出妙智一法所印故曰示智印三昧也

⑤三問訊傳旨

而白佛言世尊淨華宿王智佛問訊世尊少病少惱起居輕利安樂行不四大調和不世事可忍不衆生易度不無多貪欲嗔恚愚痴嫉妬慳慢不無不孝父母不敬沙門邪見不善心不攝五情不世尊衆生能降伏諸魔怨不久滅度多寶如來在七寶塔中來聽法不又問訊多寶如來安隱少惱堪忍久住不

○此示第七解一切語言三昧也傳彼土之言問此土之佛而問訊之辭皆衆生語言唯妙音能解故少病約身問少惱約心問起居下問身之少病世事下問心之少惱已上問能教化主無多下問所化機宜能不具大小隨眠諸惑不無不孝下問衆生俗諦事不敬下問衆生出俗事能降伏下問衆生真俗修行魔障有無事皆問現在生佛也久滅度下問過去佛往來事又問訊下亦問過去佛身心事天台云今經三處問訊病惱先達以三義通之一順同居施化本境生身示同人法故二約禮儀法爾而然故三約三身通大小故如涅槃疏云華嚴是大乘生相涅槃是大乘滅相安樂行下諸不字除不孝不敬外餘皆否

音無多貪欲至無慳慢否句上無字通貫於下謂無貪欲乃至無慳無慢否無不孝至邪見否三句其無字亦貫讀之謂無不孝乃至無邪見否善心不一句攝五情不一句能攝即意所攝即眼等五情之根謂攝令寂靜不放逸也安樂行行字平聲△衆生易度以下皆妙音藉問訊之言爲會衆說法也以貪嗔痴慢鈍使之四嫉慳隨煩惱之二邪見利使之一諸魔即煩惱與陰魔也此皆二乘所不能疾斷者有此諸障則衆生不易度矣又貪欲至慳慢等十字是總謂不孝即瞋恚亦即是不善心也不敬即愚痴亦即邪見所使也攝五情即貪欲多不伏諸魔乃慳嫉盛此皆堪忍界中人所熟習故妙音借如來鼻孔爲他出

氣也又問訊多寶聽法乃警人切聽堪忍
久住是伐人疲勞藉此發彼使一切衆生
各聽妙音各解妙語始見菩薩得解衆生
語言之實證耳不然妙音辭本師時彼佛
曾無寄言問訊也倘有此語必譯人避繁
影畧其言也

⑤四請見多寶

世尊我今欲見多寶佛身惟願世尊示我令
見

○此示第八集一切功德三昧也△妙音

既出於淨華宿王智中普利群機凡所經
到處無不天搖地震及至娑婆以瓔珞上
佛可謂功德集矣若不親見古佛不爲古
佛稱善又何以名集一切功德耶⑤五世
尊通致

爾時釋迦牟尼佛語多寶佛是妙音菩薩欲
得相見

妙音欲見古佛若不假釋迦通致又何由
得見則相見二字正是始本圓融妙音顯
露而得一切功德集聚之時看教人須好
生體認所謂鴛鴦繡出從君看也⑥六塔
中稱善

時多寶佛告妙音言善哉善哉汝能爲供養
釋迦牟尼佛及聽法華經并見文殊師利等
故來至此

佛六

十六

古佛謂供佛聞經并見文殊可謂三寶并
集正此之時塔戶未開而弘音已震且道
妙音果有見耶果無見耶但得皇風成一
片不知何處有封疆妙哉是法真不可思
議者也問妙音未發足時則已爲古佛召

發及至到此爲何不見而必欲如來通致耶答妙音始作若不因古佛何由得起及至舉作之時用既彰而體似隱今欲假如來契證使新記人不忘所自始見妙音有在要知故來至此四字字字皆有隱意正是體用俱到全彰聖化之時也奉命西來已竟⑤三十方弘經分二⑥一問答善根神力又二⑦一問

爾時華德菩薩白佛言世尊是妙音菩薩種何善根修何功德有是神力

○此示第九清淨三昧也前文殊見蓮華興起二問一問種何德本有大神力二問行何三昧已欲効之三欲求佛加被見彼色相逮妙音來直完第三請前兩問猶未結案故華德復請垂示善根功德也△問

卷六

十七

意有二一問始先種何等善根二問中間修何等功德以至今日有是神通力用也然此問意本文殊所發而文殊及見色相大小威儀進止便擲之不完所問必假華德重請復何意耶曰文殊之請本欲顯發妙音故釋迦不召而推功古佛是益見妙音難發也今既古佛宣召使妙音遐唱已得妙音宣揚即可以完妙吉祥之本智也至於華德本居因位雖見妙音未證妙智是必欲尋因求證又不得不再請垂示耳

⑤二答又二⑥一答善根

佛告華德菩薩過去有佛名雲雷音王多陀阿伽度阿羅訶三藐三佛陀國名現一切世間劫名喜見妙音菩薩於萬二千歲以十萬種伎樂供養雲雷音王佛並奉上八萬四千

七寶鉢以是因緣果報今生淨華宿王智佛國有是神力

前是文殊問妙音行體故佛推多寶今華德故問行因因行屬權所以佛自說也言過去者直指云以妙覺望九地而言其佛

號雲雷音正九地十地善慧法雲之相與不輕命終之後值二千億佛同號雲自在燈同旨國號現一切世間劫名喜見二俱是法雲善慧實報之境以法雲周徧十方說法所謂現一切世間也以法施一切無不喜見也萬二千歲下正示妙行之因按藥王燃身火然千二百歲過是已後其身乃盡是破俱生法執能所兩忘便入九地今云於萬二千歲亦是表俱生法執能所俱盡乃入九地然九地名善慧故以伎樂

十六

供佛表善慧之法音也十萬種表十波羅密門雲雷音者謂九地證百萬種三昧十方諸佛所說世界海法門皆悉領納不失所以周旋法界吼震十方故借師而表其資也此是九地因行之相復供八萬四千七寶鉢此表十地之行相也至十地時八萬四千煩惱習氣盡成真如大用故以法器表之由此二事因緣故生淨華宿王智佛國此表已入等覺地也未句結云如是大因今生佛家獲如是大神通也引此一段俾本迹兩門知其九地十地功勳不凡應宜効之

華德於汝意云何爾時雲雷音王佛所妙音菩薩伎樂供養奉上寶器者豈異人乎今此妙音菩薩摩訶薩是

此結會古今所種善根所修功德因果如是下則廣推因行

華德是妙音菩薩已曾供養親近無量諸佛久植德本又值恒河沙等百千萬億那由他佛

卷六

十九

直指云此段作兩節看已曾下是佛叙妙音從七地逆至初地因行止故曰已曾供養無量諸佛久植德本也又值下是追叙向行住信四十位因行故曰又值恒河沙等諸佛也舉所侍佛定見能行之行校本經藥王與常不輕三處十地及等妙因行或以行顯或以所侍之佛而顯或以所經劫量而顯前後照應互見可知△此節所示妙音善根功德如是之多所歷之劫所侍之佛如是之廣始見所證清淨三昧如

是之妙也②二答神力

華德汝但見妙音菩薩其身在此而是菩薩現種種身處處爲諸衆生說是經典或現梵王身或現帝釋身或現自在天身或現大自在天身或現天大將軍身或現毘沙門天王身

○此下皆示第十神通遊戲三昧也以所現身皆神通遊戲故謂華德汝但見妙音菩薩一身而不知彼於種種類中皆能現身說法也欲界舉帝釋自在二天則夜摩兜率化樂攝入其中矣色界舉梵王大自在餘皆攝盡不叙空界者以無形色故天大將軍者天台釋散脂修摩爲天大將軍其形八臂騎孔雀擎鷄持鐸捉赤幡統轄三十八部巡遊世界賞善罰惡故稱天大

將軍也此或統欲色諸天有此勇健之軍
以天大二字揀異毘沙門諸小將軍也毘
沙門者智論謂福德之名多聞四方乃北
方天王也攝東南西等三軍此明妙音示
現於三界二十八天現一一形說此妙法
也

雙

二十

或現轉輪聖王身或現諸小王身或現長者
身或現居士身或現宰官身或現婆羅門身
或現比丘比丘尼優婆塞優婆夷身或現長
者居士婦女身或現宰官婦女身或現婆羅
門婦女身或現童男童女身

輪王以聖言者揀諸小爲凡也小王者對
輪王稱之也名衆散王又中國名大附庸
名小傳傳相望小大自異長者有長人之
德備說有十故稱長者詳見譬喻品居士

乃愛談名言清淨自居者宰官者謂三台
以功能宰政於主郡縣亦稱宰官宰即主
義官乃功能義也婆羅門云淨行此上皆
現世間男子身下明僧俗四衆身或現長
者居士婦女等單明現女子身已上明妙
音於人道中示種種身說此妙法也

或現天龍夜叉乾闥婆阿修羅迦樓羅緊那
羅摩睺羅伽人非人等身而說是經

釋文皆見序品然前已叙現天身此復言
天者乃現一切天衆身也故列於八部之

卷六

三

前是見菩薩無類不現無處不說也

諸有地獄餓鬼畜生及衆難處皆能救濟
要解云諸應皆言現身說經獨於惡趣不
言者惡趣方沉幽昏無由聞經但以神力
救濟而已

乃至於王後宮變爲女身而說是經

知音云此應譯著現長者婦女之前而置於末者以王宮禁制不便遊化故也△天人最樂之地三途極苦之場而菩薩一一皆能現身說法豈王宮返不能令此法流通耶但王宮嚴禁之所非泛泛可得而行唯菩薩能現女身乃可說法故加乃至二字及變爲女身句以見難說而能說者妙音力也直指云已上皆是九地十地證法華三昧能於六道周旋往返以此法華普接十類衆生至如來地故名爲妙然此二地於機不擇者乃悟衆生平等於法則有所擇而獨說大乘所謂一相一味三昧也至普門品則隨位隨機即俗而真故爲妙行

華德是妙音菩薩能救護娑婆世界諸衆生者是妙音菩薩如是種種變化現身在此娑婆國土爲諸衆生說是經典於神通變化智慧無所損減

○此去皆示第十一慧炬三昧也以下有若干智慧照明娑婆世界等語△前兩句明妙音實爲娑婆衆生之恃怙也救護衆生者字最重即指妙音能爲現形說法之主是妙音下謂華德汝但知妙音現種種身在此娑婆處處說經而不知彼一切

淨光莊嚴國中亦如是現身說法神通智慧亦無所損減也若於說是經典下加一切淨光莊嚴國中八字其義更顯

是菩薩以若干智慧明照娑婆世界令一切衆生各得所知於十方恒河沙世界中亦復

如是

前言救護是隨類說法令其脫苦此言各得所知是隨類各解使其得樂謂菩薩慈悲普及也若干智慧明照者顯菩薩方便之多於十方恒沙下推廣其益又不止娑婆與淨光莊嚴中使一切衆生離苦得樂更於十方恒河沙世界中而神通智慧亦無所損也足見以神通遊戲現種種身以智慧照明說此妙法其三昧威神真不可思議者也

若應以聲聞形得度者現聲聞形而爲說法應以辟支佛形得度者現辟支佛形而爲說法應以菩薩形得度者現菩薩形而爲說法應以佛形得度者即現佛形而爲說法如是種種隨所應度而爲現形

極六

三三

知音云前叙六凡重所應機說世間人天乘五戒十善之妙法也此叙四聖重能應教說出世間小中大頓圓之妙法也爲欲得小乘者則法身應機作聲聞形說四諦法欲得中乘者則法身應機作辟支形說十二緣法欲得大乘者則法身應機作三賢十地菩薩形說諸度法欲得最上一乘不涉階漸頓作佛者則法身應機作報化佛形說十力無畏等法也此土彼土十方恒河沙土同時遍應無不皆然故曰如是種種等也問菩薩何以能現佛身答初住尚能分身百界況妙音之深位耶須知佛界有三教果頭佛有圓教分證佛究竟佛今所現者或果頭與分證佛似非究竟佛也△前段明菩薩現六凡身爲說妙法於

此界他方已見神通遊戲之不可思議也
今於四聖人中亦能現身說法則慧炬照
明猶不可思議也若但現凡而聖不能現
又何以當妙音之稱

乃至應以滅度而得度者示現滅度

知音云上明妙音證獲法身般若北方明
證獲解脫德也謂菩薩不唯現身在此即
應以涅槃得度者亦於無生滅中示生滅
也此如本會如來唱滅大衆感悟同意
華德妙音菩薩摩訶薩成就大神通智慧之
力其事如是

此以結成所問善根功德也謂如汝所問
而妙音所修所種成就如是大神通遊戲
如是大慧炬照明普益有情其事如是也

④二問答今住何定又二⑤一問

經六

三十四

爾時華德菩薩白佛言世尊是妙音菩薩深
種善根世尊是菩薩住何三昧而能如是在
所變現度脫衆生

此問今果德住何三昧也謂如妙音菩薩
之善根功德及神通之相我已悉知但未
審即今住於何定能如是自在變現於十
方刹海利益衆生也但因果乃二利之要
關故當細問⑥二答

佛告華德菩薩善男子其三昧名現一切色
身妙音菩薩住是三昧中能如是饒益無量
衆生

○此示第十二莊嚴王三昧一切色身爲
所現即前十法界身是也法身爲能現即
前不起於座身不動搖者是也然法身爲
一切色身之主一切色身爲法身之莊嚴

故此問答明莊嚴王三昧雖酬華德亦是
答文殊所問行何三昧願爲我等說是三
昧名字也明十方弘經已竟四二土得
益

說是妙音菩薩品時與妙音菩薩俱來者八

極六

二十五

萬四千人皆得現一切色身三昧此娑婆世
界無量菩薩亦得是三昧及陀羅尼

○此雖叙兩土大衆聞法得益其實示第
十三淨光明三昧也自住法身曰淨普照
衆生曰光明今一說妙音神智即令人同
得豈非三昧及總持乎並結訖文殊云我
等亦欲勤修行之之案天台云三昧與陀
羅尼用異而體同也寂用名三昧持用爲
陀羅尼又色身變現名三昧音聲辯說爲
陀羅尼又舌根清淨名陀羅尼餘根清淨

名三昧俱是六根清淨法門耳妙樂云現
色身名三昧音聲名陀羅尼者語言與色
身但是身口之異耳豈現身不能說法耶
從事雖別其理必同三昧從定陀羅尼從
慧即不思議定慧故得互用耳

五還歸本國

爾時妙音菩薩摩訶薩供養釋迦牟尼佛及
多寶佛塔已還歸本土所經諸國六種震動
雨寶蓮華作百千萬億種種伎樂

○此示第十四淨藏三昧也以還歸本土
表一切色身神智變現皆藏於淨法界身
之藏海故問妙音既彼此二土及十方恒
河沙世界皆同時徧在又奚重煩來往答
菩薩本具三身應化身則隨十法界現有
大有小報應身則見有往來法身則遍一

切處而無往無不往無來無不來也妙音
於諸土隨類現者應化身也彼此往來者
報身也

既到本國與八萬四千菩薩圍遶至淨華宿
王智佛所白佛言世尊我到娑婆世界饒益

極六

三六

衆生見釋迦牟尼佛及見多寶佛塔禮拜供
養又見文殊師利法王子菩薩及見藥王菩
薩得勤精進力菩薩勇施菩薩等亦令是八
萬四千菩薩得現一切色身三昧

○此雖叙復命之辭其實示第十五不共

三昧以復命之辭不叙共二乘人得益故
所以然者一則二乘人皆已受大乘記無
非菩薩也一則明妙音來往智慧神通皆
是化菩薩法不與一切二乘人共也經文
其深玄哉△妙音作此舉止其二利功德

甚深到本國者即究竟還歸也八萬四千

圍遶者乃體用兼到也下叙白本師得利
益謂我到娑婆使無量衆生得三昧總持
證不思議定慧可謂饒益無量也見釋迦
即始覺顯露於多寶而言見塔乃本覺無

相但言禮拜供養而已見文殊即得大智
見藥王即得大行如此行智非勤精進力
不能作大勇施由此智行進勇一切具足
故八萬四千妙用法門無不備彰使化功
歸已無不圓滿如此運爲豈徒然哉（六）

極六

三七

聞品進道

說是妙音菩薩來往品時四萬二千天子得
無生法忍華德菩薩得法華三昧

○此雖通結一品之文其實示第十六日
旋三昧也以娑婆去一切淨光莊嚴佛國

有百八萬億那由他恒河沙等世界之遙而妙音來往可謂如果日麗中天也吾人能得此品妙義者亦如日麗中天有目有趾者無不待是而成功也故叙得益以四萬二千天子得法忍言明菩薩報應身之日雖有往來而法身之天曾無生滅也法華三昧其體相如是故華德問此而亦證此也問前已叙得益此奚復叙答前叙兩土菩薩是深位有益也今叙天子及當機則知見聞之益亦廣矣三昧之名亦異矣明妙音往來已竟

妙法蓮華經授手卷第七之一

音釋

甄居延切 鸛於莖切 鵠文甫切 嘴祖委切 趾諸氏切 也足陶也

妙法蓮華經授手卷第七之二 極七

清楚衡雲峯沙門智祥集

觀世音菩薩普門品第二十五

品節云此品意以法華三昧始覺因圓妙契果海逆流而出現十法界身雲無思而

極七

應所謂聖種類身一時俱現乃得種類俱生無作意生身之象也由永滅根本無明鏡智顯現故曰普門示現良以大士初因如幻聞熏金剛三昧力故得生滅滅寂滅現超越世出世間上同慈力下合悲仰能以一身普應一切獲三種妙用所以有十三應十四無畏十九說法七難二求無不感應此見妙行圓滿法華三昧之功德成就妙極於此故以三種意生身證行成德也聖旨昭然深觀可見然而妙行雖圓

誠恐行人餘習緣影難盡則又說三種加持乃可克成妙果故次以三品終焉天台引別行玄云觀世音者西土正音名阿耶婆婁吉低輸此云觀世音能所圓融有無兼暢照窮正性察其本末故稱觀也世音是所觀之境萬像流動隔別不同類音殊唱俱蒙離苦菩薩弘慈一時普救皆令解脫故曰觀世音此即境智雙舉能所合標也普門者普是徧義門曰能通用一實相開十普門無所障礙故稱普門此總釋也別釋有通別二種通有十雙別有五隻十雙者一人法爲名此品有兩翻問答人即觀世音依前問答而名也法即普門依後問答而立也二以慈悲爲名觀世音者即大悲拔苦依前問答百千苦惱皆得解脫

也普門者大慈與樂依後問答應以得度而爲說法也三以福慧爲名觀世音者智慧莊嚴智能斷惑如明時無暗普門者福德莊嚴福能轉壽如珠雨寶故知前問答應機拔苦是慧莊嚴後問答住首楞嚴定

極七

二

普現色身是定莊嚴四以真應爲名觀世音者觀冥於境即真身也普門者隨所應現即應身也五以藥珠爲名觀世音者如藥王樹徧體愈病也普門者譬如意珠隨意所與也六以冥顯爲名觀世音者冥作利益無所見聞三毒七難皆離二求兩願俱滿普門者顯作利益目覩三十二身耳聞十九尊教也七以權實爲名觀世音者隨自意照實智境普門者隨他意照權智境也八以本迹爲名觀世音者不動本際

也普門者迹任方圓也九以緣了爲名觀世音者根本是了因種子普門者根本是緣因種子也十以智斷爲名觀世音者究竟是智德普門者究竟爲斷德也經文兩翻問答義含無盡略用十雙釋品通名其義如是別論五隻者即以觀世音普門五字訓也第一觀者亦有多種謂析觀體觀次第觀圓觀也析觀者滅色入空體觀者即色是空次第觀者從析觀乃至圓觀圓觀者即析觀乃至次第觀皆實相也今揀前三觀唯論圓也第二世者亦有多種謂有爲世無爲世二邊世不思議世有爲世者即三界世無爲世者即有餘無餘二涅槃世二邊世者即生死涅槃世不思議世者即實相境今揀前三但取不思議也第

極七

三

三音者音即機也亦有多種人天機二乘機菩薩機如來機人天機者即諸惡不作衆善奉行二乘機者即厭畏生死欣尚無爲菩薩機者即先人後己慈悲仁讓佛機者一切諸法中悉以等觀入一切無爲人一道出生死今揀前三唯取佛音機也是因緣故名觀世音第四音者周徧也諸法無量若不得普即是偏法法若成徧焉能圓應略約十法明普一慈悲普二弘誓普三修行普四斷惑普五入法門普六神通普七方便普八說法普九成就衆生普十供養諸佛普得此意已類一切法無不普也釋明十義廣如科註茲不繁引第五門者從假入空空通而假壅從空入假假通而空壅徧通則非普壅故則非門中道

非空非假正通實相雙照二諦故曰普門是故此品爲普現三昧化他流通也②三以觀音普門示現周徧流通分三③一長行又二④一明兩翻問答復二⑤一問觀世音名分二⑥一當機致請又二⑦先經家叙

爾時無盡意菩薩即從座起徧袒右肩合掌向佛而作是言

此以無盡意當機者顯前品妙音雖於神通智慧無所損減由往來之意未泯則意猶有盡若觀音以圓照三昧上同下合現一一形說一一法又不似妙音但說此經若此經流通則妙音亦止故知普門示現意無有盡故當機以無盡意而發問也爾時者即東方之妙音既竟而西方之觀音

又發正此之時始見有無盡意從座起也

子二正興問

世尊觀世音菩薩以何因緣名觀世音

下有兩翻問答初問觀世音人也後問普門法也此是初問觀字當作平聲讀乃根

極七

本智若作去聲則屬功勳此爲能觀世音乃所觀境智則唯一而境有萬殊世字該有情世至正覺世乃十界正報音字即十界衆生所發之言音也音當耳聞而言觀者顯菩薩不思議力用無根不聞也以何因緣者謂前妙音故知奉樂供鉢以爲因緣所以得妙音名今菩薩名觀世音者觀本屬眼宜以對色世音乃聲宜乎對耳今根境既不相侔未審有何因緣得是名也

④二如來詳答分三⑤一總稱名答又四

④一人數

極七

佛告無盡意菩薩善男子若有無量百千萬億衆生

此正答因緣也天台云十法界機實是無量而言百千萬億者非謂十界共有此數蓋指一業有如許人如一地獄同受一苦以苦驗人知同一業以例諸趣亦皆如是故知此數是標同業之意也此舉境衆機多以顯觀深應大△舉數處以若有字是不定語或一人十人百千人已至無量人是其正意④一遭苦

受諸苦惱

○此明現遭苦厄也自有多苦苦一人多人受一苦一人受多苦一人受少苦今言萬億衆生多人也受諸苦多苦也舉多顯

少無不來應③三稱名

聞是觀世音菩薩一心稱名

此以善惡相帶合為機也由惡遭苦因善聞名大眾云一心二字是脫難之本正謂攝心一處便是觀音出現時也蓋菩薩與衆生同體徧在一切衆生心中菩薩之名徧在一切衆生耳裏但不肯一心注念循聲流轉却與菩薩遠隔千里若能一心稱名則觀音不離當處若百千萬億受苦衆生同時一心稱名則同時離諸苦惱也④

四解脫

觀世音菩薩即時觀其音聲皆得解脫

天台云上聞即稱是機速今稱即驗是應速皆得解脫者即是蒙應利益皆者非但顯於多機衆益亦顯圓徧之應也△楞嚴

六

六

云一者由我不自觀音以觀觀者令彼十方苦惱衆生觀其音聲即得解脫即時者於一心稱名無間無斷時四相俱空不覺不知則得觀其音聲如從夢覺菩薩即時顯現身心相滅豈不皆得解脫耶

⑤二別脫苦答分三⑥一口機應物又二
⑦一明七難分七⑧一大火難分四⑨一稱名

若有持是觀世音菩薩名者

○此別答中不出三業應機今七難是口機以稱名故三毒是意機令常念故二求是身機常禮拜故△若有持者謂一向持名之人應無火災下出設遇不燒乃見持則通靈所應不虛也⑩二遇苦

設入大火

天台云此下釋諸難例為三意一貼文二舉事三觀行貼文者若有設有等皆不定之辭餘皆難起方始稱名今先舉稱名而後遭難者或前後互說耳又或火災卒暴須預憶持不入此難也二舉事證晉時謝

楊七

七

敷作觀音應驗傳載祝長舒晉元康年中於洛陽為延火所及草屋下風豈有免理由一心稱名風回火息隣房亦滅又僧法力者於魯郡起精舍從上谷乞麻一車法力疲極小卧於空野遇火比覺火勢已及纔舉聲稱觀未及稱世音而火已滅傳載非一姑畧引耳觀行釋者火有多種果報火從地獄至初禪皆有洞然燒炙無能免者業火通三界故經云燒諸善根無過瞋恚能破善根退上墮下皆名為火煩惱火

得脫

火不能燒

不能燒者由一心稱名之時自心火滅況一切諸境皆從心生心若不生妄緣自息然正當大火猛焰之際其能相忘於無事之境不驚不怖有幾人哉遇火不燒斯由菩薩神力及自心念力故也

④四明應

由是菩薩威神力故

楞嚴云二者知見旋復以脫塵內伏故令

一切遇火衆生一心稱名頓免其難然大火到時勢不可救而云不燒者菩薩威神之力也△更須知火本屬眼發於所見境至而神投自然勢也如見愛則欲火頓生見憎而瞋火疾作若不旋見還明何由得

減⑧二大水難

若爲大水所漂稱其名號即得淺處

天台釋亦有三一貼文者遭水是苦稱名是善即爲機也得淺處即應也言大水者以小水不成難故二引證應驗傳云海鹽有人溺水同伴皆沉此人稱觀音遇得一石忽然如夢見兩人乘船喚入開眼果見人船及送達岸人船俱隱又僧道罔三人乘米度孟津垂半一人前陷一人次沒罔進退水上度死無疑但一心稱觀世音脚

如踏板夜遇赤光竟得達岸此皆神力所應也三觀釋者果報水自地獄以至二禪無能免者惡業水通三界諸惡破壞善業悉名惡業波浪煩惱水亦通三乘所謂煩惱大河能漂香象無明所盲不能得出聲聞發二三果名淺處無學爲彼岸支佛侵習爲淺處通教正習盡爲彼岸別教斷四住惑爲淺處斷無明爲彼岸圓教十信位中六根清淨爲淺處入初住爲彼岸△楞嚴云三者觀聽返入致令持名衆生水不能害然水本屬耳出於所聞愛則水生怒即淚注菩薩由旋聞聲脫使稱名者無水難也

⑨三羅刹難

若有百千萬億衆生爲求金銀琉璃磑磑碼

珊瑚琥珀珍珠等寶入於大海假使黑風吹其船舫飄墮羅刹鬼國其中若有乃至一人稱觀世音菩薩名者是諸人等皆得解脫羅刹之難以是因緣名觀世音

天台釋難亦三一貼文者入海求珍結伴無定然亦非獨往今舉總數但曰百千萬億也爲求下出其所求之名以等字攝諸異寶必入大海者以海爲衆寶所聚賢愚經云田殖百倍商賈千倍仕宦萬倍入海吉還得無量倍故必應入海也△假使者偶然值遇未必入海者盡然也此科應重在黑風二字照前水火此當風難不然與後鬼難爲重疊矣大海遇風甚爲可畏況其風黑則向徃皆迷必至於墮鬼國無疑矣羅刹乃食人鬼其畏猶其次下明機謂

正當大怖畏時於多人中乃至一人稱名則一切人俱免斯害豈不爲菩薩威力之所至哉獨是一人稱名是一人靈顯衆感未彰應何濫及然衆口雖默而求救之心必切心切而神現理亦宜然此亦菩薩不思議大悲所被也二引證外國有百餘人從師子國泛海向扶南遇惡風墮鬼國中俱大怖稱聖號中有一小乘沙門不信觀音鬼遂取沙門食由是狼狽學稱亦得免難三觀釋者不但明世界中風黑業亦名風華嚴云嫌恨猛風吹罪心火常令熾然吹諸行商人墮落惡趣果報風至三禪惡業風通三界煩惱風通三乘廣如科註中明然一稱名俱得脫苦此見尋聲救苦之實也楞嚴云六者聞薰精明明徧法界則

諸幽暗性不能全既無黑風即不墮諸鬼國矣以是下並上水火以結答當機所問以何因緣此謂以是因緣也④四王者難若復有人臨當被害稱觀世音菩薩名者彼所執刀杖尋段段壞而得解脫

○釋王難亦三一貼文遭難是苦稱名是善即機也而得解脫即蒙應也二引證應驗傳云昔大元中彭城有人被枉爲賊其人本供金像常納髻中及伏法刀下但聞金鐵聲三斫而頸無傷詢之得髻中金像頸有三痕其他不及廣引三觀釋者果報刀杖從地獄至欲天惡業刀杖通三界煩惱刀杖通三乘謂凡所修善因爲三毒刀箭惡業破壞善心割斷戒皮定肉慧骨微妙心髓等若能至心稱名如是刀杖無不

極七

十一

解脫△言臨當被害正當幾時乃能所境對一稱名而刀段段壞即能所消忘也楞嚴云五者熏聞成聞六根銷復同於聲聽使其兵戈猶如割水亦如吹光性無搖動神力所致也⑤五惡鬼難

若三千大千國土滿中夜叉羅刹欲來惱人聞其稱觀世音菩薩名者是諸惡鬼尚不能以惡眼視之况復加害

○釋鬼難亦三一貼文若三千下標處欲來下明遭難是苦聞其下稱名是善此即機也鬼不能害是蒙應也△前言漂墮是人入鬼國此言欲來惱人是鬼到人所言大千滿中俱鬼而亦實有事也不見教中道娑婆世界有插針不入的鬼但人能稱名鬼心即滅豈不如紅爐之點雪耶二引

證上羅刹難中已彰其事茲不繁叙三觀
釋者若果報鬼自地獄至天宮皆有此難
如地獄中有大力鬼惱諸罪人餓鬼中有
惡鬼害諸小鬼畜生中有惡鬼食瞰天中
如阿含經云有大力鬼坐帝釋床帝釋大
瞋鬼光亦熾等惡業鬼通三界如貪瞋癡
俱是鬼義煩惱鬼通三乘如謂見心爲男
鬼愛心爲女鬼見使歷三界有八十八愛
即思也有八十一其大千滿中俱鬼亦不
虛也二乘人有斯鬼難菩薩有無明鬼愚
癡羅刹等若能至心念菩薩名無不解脫
楞嚴云四者斷滅妄想心無殺害令諸衆
生鬼不能害使持名者得益之時不唯不
敢加害即欲以惡眼偏視亦不敢也卽六
枷鎖難

佛七

十二

設復有人若有罪若無罪杻械枷鎖檢繫其
身稱觀世音菩薩名者皆悉斷壞即得解脫
○釋枷鎖難亦三一貼文設復下先標有
罪無罪杻械下明遭難是苦稱觀音下稱
名是善此爲機也皆悉斷壞等明應也有
罪無罪者或實有罪或果無罪又或推檢
未定皆被囚執也△無罪者當然有罪者
亦免何也此明聖心平等本以救囚執爲
應不論罪之有無也在手名杻在脚名械
在頸名枷連身名鎖此則三木一錢之名
繫即繫礙檢是封檢繫未必檢檢必被繫
也繫而被檢憂怖亦深若能稱名者重關
自開鐵木易壞矣二引證應驗傳云蓋護
山陽人繫獄應死三日三夜心無間息卽
眼見觀音放光照之鎖脫門開尋光而去

行二十里其光乃息三觀釋一果報枷鎖

三途及人不言可知修羅亦有五縛唯北

洲及天上自無此難二惡業枷鎖若人修

習善法被惡業覆心使善法敗壞即爲惡

業所縛於三界中無由解脫三煩惱枷鎖

七

三乘人未至究竟皆爲煩惱所縛不得自

在若能至心念菩薩名而一切枷鎖無不

解脫楞嚴云七者音性圓消離諸塵妄妄

塵既離夫復何繫所以令持名者得解脫

也⑦怨賊難

若三千大千國土滿中怨賊有一商主將諸

商人齋持重寶經過險路其中一人作是唱

言諸善男子勿得恐怖汝等應當一心稱觀

世音菩薩名號是菩薩能以無畏施於衆生

汝等若稱名者於此怨賊當得解脫衆商人

聞俱發聲言南無觀世音菩薩稱其名故即得解脫

○釋怨賊難亦三一貼文大千國土者標難處也滿中怨賊明難事也滿中者顯國曠賊多聖力能救也怨必奪命賊乃奪財今賊而復怨其財命俱奪必矣甚爲恐懼△寶重而路險賊臨而復怨害豈淺鮮耶此中一人力勸稱名謂菩薩能以無畏施人若稱者必當脫苦何異久旱中之聞巨雷衆商共稱何異孤旅中之遇父母是諸知契而二知泯豈不能成解脫哉商主等乃遭難之人商者能擇貴賤善解財利商量得宜堪爲商人之主一人下明機一明安慰二勸稱名三歎聖德四俱發聲所以安慰者止其恐怖也勸稱者設其上策也

歎德者獎令定膽也二引證應驗傳云僧
慧達以晉隆安二年於隴上掘甘草時餓
羗正捕人食即獲慧達閉於柵中擇肥者
先食達怖但一心稱名並誦是經人食已
盡唯達與一小兒次擬明晨取食達竟夜

極七

十四

稱誦似無所感向曉羗來取達忽一猛虎
從草透出哮吼不已諸羗散走虎齧柵作
一穴而去達並小兒俱得免害三觀釋一
果報寬賊自地獄至六天俱有鬭爭二惡
業寬賊若修善時惡多是寬三煩惱寬賊
三乘以一切煩惱是出世怨心般若是商
主五度衆行是商人法性實相是重寶六
敵是怨賊若能一心稱名一切怨賊俱得
解脫楞嚴謂八者滅音圓聞遍生慈力益
音聞兩立則物我成敵音滅聞圓則内外

無待故能遍慈而却敵也④二結神力
無盡意觀世音菩薩摩訶薩威神之力巍巍
如是

天台云觀音智力既大加護亦廣矣豈止
但應七難當知徧法界皆能救護故言巍
巍巍者重明高累之辭也觀音之力出
於同居分段二死之外豎應方便實報二
土之間故言重明載沐神應故言高累口
機應物已竟⑤二意機應物分二⑥一離

三毒

極七

十

若有衆生多於婬欲常念恭敬觀世音菩薩
便得離欲若多瞋恚常念恭敬觀世音菩薩
便得離瞋若多愚癡常念恭敬觀世音菩薩
便得離癡

天台云此三通稱毒者以能侵害行人故

但有單複言耳若云貪瞋癡名單今從複列故云姪欲等也自愛為欲愛他為姪自忿為恚忿他為瞋自惑為愚惑他為癡今明三毒多者而菩薩威力尚令得離况少者耶要解云離欲者由菩薩熏聞離塵色所不劫之力也蓋眾生以欲習合塵故為色劫一蒙妙力則欲愛乾枯根境不偶雖有妖色不能劫動也離瞋者由根境圓融無能所對之力也蓋瞋由違情而起對境而生圓融則無違無對而瞋可離矣離癡者由消塵旋明朗徹無礙之力也蓋癡為妄塵所蔽無明所覆消塵則無蔽朗徹則無覆故能旋復真明永離癡暗也⑤二顯威神

無盡意觀世音菩薩有如是等大威神力多

所饒益是故眾生常應心念

此言如是者指前三毒等字攝慢疑及諸見也然十結使皆為三界深惑而三毒猶重故特舉也令離三毒而曰大威神曰多饒益者以前七難尚是外境而三毒乃一切眾生無始無明之固結根深蒂固若非大威神大猛力豈易斷哉三毒不除生死何出今既諸妄銷忘自應一真顯露其悟入佛之知見亦不難矣故曰多所饒益前七難中但曰一心稱名或曰稱其名號今必曰常應心念者由三毒幽微防之應密眾生若能常念常敬毒從何發稍一忘念則妄塵競集而三毒起矣故使行人於菩薩聖境常當心念也④三身機應物分二

⑤一正明誠求又二⑥一求男

若有女人設欲求男禮拜供養觀世音菩薩
便生福德智慧之男

知音云凡女人身以夫貴而貴然色難常
好夫愛莫恒唯有生男乃可永賴故女人
必欲求男也若生男無福家不足興無德
名不足盛無智身不足貴無慧道不能行
故求菩薩即欲生福德智慧之男也然求
必有遂者由菩薩融形復聞不動道場乃
至各各佛邊爲法王子之力蓋菩薩於諸
佛既具子道故令求即得也△世人不求
而生男女者尚多今言欲求者是有所願
欲也禮拜供養是誠求之行便生福德等
乃明感應道交也○二求女
設欲求女便生端正有相之女宿植德本衆
人愛敬

論七

十七

知音云女不端正色雖美而內政莫立不
有相貌心雖端而外見罔貴不宿植德本
則不知敬重三寶亦令人不生愛敬也然
菩薩使誠求人必生如是女者由六根圓
通名照無二乃至承順十方微塵如來秘
密法門領受無失故也易云至哉坤元乃
順承天今菩薩以圓通妙體既能明照又
能承受有坤道焉坤厚載物故令求者便
生含弘光大端正有相之女也然三毒乃
衆生所常有之正性多則爲害也深二求
乃衆生常有之正情少則爲嗣也絕故或
惡其多或慮其絕一念敬聖名供聖像皆
響應者乃不思議之妙用也○二結福不
虛

無盡意觀世音菩薩有如是力若有衆生恭

敬禮拜觀世音菩薩福不唐捐

此結身業應機之不虛也恐疑者謂自有禮拜不蒙願者故此云若能恭敬禮拜而所得福必不虛棄唐捐者虛棄也其所以不蒙應者由感之未至非應之不及也別

答脫苦已竟

⑤三勸持名答分三⑥一勸持

是故衆生皆應受持觀世音菩薩名號

天台云上說觀音得名因緣其力廣大既不辯形質但述名論德若欲歸崇宜奉持

名號故舉持名為勸也△是故者指前救七難離三毒應二求種種威神之故皆應者廣勸持名也謂菩薩有如是大威神力不唯有難有毒有求者當持即一切衆生皆應受持也向下較其所當持之福⑦二

十七

十八

格量

無盡意若有人受持六十二億恒河沙菩薩名字復盡形供養飲食衣服卧具醫藥於汝意云何是善男子善女人功德多不無盡意言甚多世尊佛言若復有人受持觀世音菩薩名號乃至一時禮拜供養是二人福正等無異於百千萬億劫不可窮盡

此明持菩薩名如食金剛非食他物可比也直指謂初舉一人廣大之福為本六十二億福田多盡形壽時節多四事具足供養多持名號恭敬多舉此四事為校量本於汝下問也無盡意下答也佛言下又單舉一人稱觀音名正格量也還舉四大以格四多而其功德正等○問何故持諸菩薩之功多而福返少持觀音之功少而福

返多答諸菩薩尚在五十四位中而觀音
已居等覺如二人者一人多奉諸臣一人
專敬于主則其承恩之差等可知矣又圓
通中自陳謂我一名號與彼衆多名號無
異由我修習得真圓通以是則知自他正
等也⑤三結歎
極七 十九
無盡意受持觀世音菩薩名號得如是無量
無邊福德之利

○一時稱名福不可盡大品云一華散空
乃至畢苦其福不盡義疏云一華供佛以
類一時持觀音名言畢苦者二死永盡也
謂直至成佛而散花之福猶尚不盡必以
六十二億為校量者乃擴六根而言也已
上總成十四無畏即是與諸衆生共一悲
仰也問答人名已竟

妙法蓮華經授手卷第七之二

音釋

踏他合切舫音訪舟師也

妙法蓮華經授手卷第七之三

極八

清楚衡雲峰沙門智祥集

⑤二問普門示現分二⑥一問施三業

無盡意菩薩白佛言世尊觀世音菩薩云何遊此娑婆世界云何而爲衆生說法方便之

力其事云何

機八

天台云前問何緣得名佛答衆生三業顯機爲境法身靈智冥契爲應由此境智因緣而得名也今問云何遊等佛答以普門示現三業顯應以答冥機云何遊是身云何說是口方便是意聖人三業無謀而徧應一切亦名三輪不思議化也義疏云衆生稱名常念及以禮拜三業現前故言顯機法身靈智即始本二覺分合之真身也乃以智拔苦故曰冥應今明菩薩意鑑機

身現相口說法令衆生有覺知見聞故曰

顯應然且不說衆生三業修行之相此由

宿善冥伏在懷乃能致感故曰冥機又以

方便問意業者非是道前取理方便此爲

證後鑒機之方便也⑥二答其妙應分二

⑦一答所現身

佛告無盡意菩薩善男子若有國土衆生應以佛身得度者觀世音菩薩即現佛身而爲說法

此並答三問也天台云應以二字答意蓋

意地觀機見其所宜當示何身說何法也

現身即身業說法即口業也此別答中凡

現三十二身十九說法束爲十界身而缺

菩薩地獄二界菩薩即是本身豈復言缺

地獄應有但文畧耳別答雖無總中亦具

謂以種種形遊諸國土者是也三十二身分分爲八一聖身二天身三人身四四衆五婦女六童男七八部八金剛身聖身中先明佛身者或是應佛或是化佛但聖人逗物具有二義若一時歛有爲化應同始終名應然應佛卽有兩相一勝應二劣應勝應圓別之機劣被藏通之衆知音云國土衆生者約大千依正二報總言機也應當也以用也謂大千土中若有一圓頓機衆生欲不涉階漸直下成佛則此人當用佛身得度故卽現其身爲說圓滿果法也楞嚴云若諸菩薩入三摩地進修無漏勝解現圓我現佛身而爲說法者是也應以辟支佛身得度者卽現辟支佛身而爲說法

三八

二

○如文殊二萬億刳作辟支佛教化衆生現身說法楞嚴云若諸有學寂淨妙明勝解現圓等則所說乃寂靜妙明緣覺法也應以聲聞身得度者卽現聲聞身而爲說法○或作藏通聲聞或作隨五味轉聲聞內秘外現引導衆生也楞嚴云若諸有學得四諦空修道人滅等則所說乃四諦聲聞法也此明現四聖身次明現六凡身

三八

三

應以梵王身得度者卽現梵王身而爲說法○瓔珞經云四禪皆有王此言梵者應是初禪頂猶有覺觀語法得爲大千世界主蓋言觀音修白色三昧不取不捨不取故不隨禪生不捨故應爲梵王說出欲論以權引實也楞嚴云若諸衆生欲心明悟不犯欲塵等則所說離欲法也

應以帝釋身得度者卽現帝釋身而爲說法
○以菩薩修白色三昧不取不捨說種種
勝論以權引實楞嚴云若諸衆生欲爲天
主統領諸天等則所說者五戒十善法也
應以自在天身得度者卽現自在天身而爲
說法

○梵語婆舍跋提此云他化自在假他所
作以成已樂卽魔王也淨名經云多是不
思議解脫菩薩住赤色三昧不取不捨應
爲魔王令諸魔界卽入佛界楞嚴云若諸
衆生欲身自在等則所說遊行十方之法
此下凡所現身皆是菩薩住於三昧以權
引實例此可知

應以大自在天身得度者卽現大自在天身
而爲說法

○樓炭經名阿迦尼吒華嚴稱色究竟釋
論云摩醯首羅稱大自在騎白牛八臂三
眼乃諸天之將未知與此同名耶爲卽指
此天耶又釋論云過靜居天有十住菩薩
號大自在爲大千界主依此則將非指此
也楞嚴云若諸衆生欲身自在飛行虛空
等則所說欲身自在之法也
應以天大將軍身得度者卽現天大將軍身
而爲說法

○金光明經卽以散脂爲大將又云鳩摩
伽此云童子楞嚴云若諸衆生愛統鬼神
救護國土等則所說救護國土法也
應以毘沙門身得度者卽現毘沙門身而爲
說法

楞嚴謂若諸衆生愛統世界保護衆生等

則所說保護衆生法也然楞嚴有現四天王及太子此以毘沙門該之蓋此爲四王之一也解現妙音品已上叙現天乘主帥下叙人間王臣

應以小王身得度者卽現小王身而爲說法
小王者對輪王言也楞嚴云若諸衆生樂爲人王等則所說十善道法也然人王故非平人之所樂爲而菩薩亦與說法以遂樂爲之願者爲欲理治邦國風化人民使道法流通所以亦應求也

應以長者身得度者卽現長者身而爲說法
解見前品則所說主族姓世間推讓法也
應以居士身得度者卽現居士身而爲說法
此有德無位以道自處者也則所說名言清淨自居法也

應以宰官身得度者卽現宰官身而爲說法
三台輔相州牧縣長悉曰宰官則所說治國土斷邦邑法也

應以婆羅門身得度者卽現婆羅門身而爲說法

西域四姓此其一也名淨行亦名梵志則所說數術攝衛法也數術卽占相等攝衛卽調護身壽醫藥等

應以比丘比丘尼優婆塞優婆夷身得度者
卽現比丘比丘尼優婆塞優婆夷身而爲說法

此應僧俗四衆則所說五戒十戒及二百五十戒與五百戒之法也

應以長者居士宰官婆羅門婦女身得度者
卽現婦女身而爲說法

知音云此與楞嚴少異彼一現女主二現國夫人三現命婦四現大家孤山云女主即天子之后國夫人如論語邦君之妻曰君夫人命婦謂妻因夫榮者大家如後漢扶風曹世叔妻者同郡班彪之女名昭字惠姬和帝數召入宮令皇后貴人師事焉號曰大家此中長者宰官婦女合彼命婦不云現女主國夫人者以妙音於王後宮變爲女身而說是經已叙之矣則所說內政立身以修家國之法也

應以童男童女身得度者即現童男童女身而爲說法

取妙莊嚴王二子釋及華嚴童子算沙嬉戲等是也則所說不壞男根不求侵暴等也已上現世間男女竟次現八部

佛八

六

應以天龍夜叉乾闥婆阿修羅迦樓羅緊那羅摩睺羅伽人非人等身得度者即皆現之而爲說法

楞嚴開叙爲九科則所說樂出其倫之法也

應以執金剛神得度者即現執金剛神而爲說法

梵語跋闍羅此云金剛梵語波膩此云手有執義即以執金剛杵爲名正法念經云昔有國王夫人生千子欲試當來成佛次第故拘留孫佛探得第一籌乃至樓至如來得千籌第二夫人生二子一願爲梵王請千兄說法一願爲金剛神護千兄佛法故有此也答所現身已竟①二總答度生

無盡意是觀世音菩薩成就如是功德以種種形遊諸國土度脫衆生

此結上總別答問也天台云諸名不一橫則周徧十方豎則冠通三土隨緣變現何止三十二身託化逐緣豈局娑婆世界以

佛

七

種種形總明示現身廣遊諸國土明所化處廣度脫衆生明所得益廣言雖畧於上義則廣於前也知音謂楞嚴云是名妙淨三十二應入國土身皆以三昧聞熏聞修無作妙力自在成就准彼無作自在妙淨之言則此中十九說法皆在機感上論於菩薩法身如鏡應像如月現水此正所謂上合十方諸佛同慈力也明兩翻問答已竟

⑤二勸至誠供養分二⑥一如來勸供

是故汝等應當一心供養觀世音菩薩是觀世音菩薩摩訶薩於怖畏急難之中能施無畏是故此娑婆世界皆號之爲施無畏者是故者指前兩翻問答之故前答問中先總後別以難是衆生苦境意恐菩薩應不普被故先總曰受諸苦惱一心稱名皆得解脫是明菩薩悲心無極而下合衆生也前重一心稱名以菩薩真身實應無可尋求只可稱名而已後答問中先別後總以現身是衆生樂緣意恐菩薩既普現十法界身雲其妙應不過此耳故後總云以種種形遊諸國土是明菩薩慈心無盡而上同諸佛也今此復勸一心供養者由菩薩於一切衆生前現身說法則見種種色聞種種聲既聞見分明所以當一心供養也

前曰一心稱名是知有菩薩可供後曰一

心供養是見有菩薩可敬如是一心如是

恭敬久而不退則可以入佛知見矣楞嚴

以十四無畏卽救七難赴二求免三毒等

爲無畏今於三十二應之後又言怖畏急

極八

難中能施無畏則是總前兩翻問答以離

苦得樂皆名無畏今言娑婆稱施無畏而

楞嚴云十方微塵國土皆名施無畏者蓋

見其所當供養也④二無盡受旨分六⑤

一奉命

無盡意菩薩白佛言世尊我今當供養觀世

音菩薩卽解頸衆寶珠瓔珞價直百千兩金

而以與之作是言仁者受此法施瓔寶瓔珞

此見當機奉命不惜所珍得法自在爲法

施也佛云汝等當供養則下出其無畏當

機云我今當供養則下解其所珍所以見

至重忘而無畏得矣言衆寶者乃間錯而

成也瓔珞經云從初住銅寶乃至等覺摩

尼寶今曰寶珠其位例可知矣天台云頸

表中道一實之理以衆多無着法門莊嚴

實相如瓔珞嚴頸也解者表菩薩於一切

行願功德乃至佛智涅槃皆不住着也百

千表一地有萬功德地地增多也法施如

法而施卽佛智涅槃俱能捨故⑥二不受

時觀世音菩薩不肯受之

極八

九

解頸瓔珞正菩薩所嘉與但無不肯受三

字何以申無盡之解代衆而解衆亦不喻

解之之意矣自無盡意以愍我等言之佛

又以愍無盡意及愍八部等勸之而解瓔

珞之意斯人人喻之矣故觀音之不受無

盡意之懇受世尊之勸受俱是令衆知解
一意千佛萬佛只要人知解故也○三求
愍

無盡意復白觀世音菩薩吉仁者愍我等故
受此瓔珞

以愍我等三字爲可受之本當機以愍衆
而施菩薩以愍衆而受則二俱法施也○
四佛勸

爾時佛告觀世音菩薩當愍此無盡意菩薩
及四衆天龍夜叉乾闥婆阿修羅迦樓羅緊
那羅摩睺羅伽人非人等故受是瓔珞

直指云佛所以勸觀音愍衆而受之者正
爲四衆八部未入妙行所以囑觀音大悲
攝取乃得終始究竟四衆該本迹正記者
八部該本迹外護遺流者始見意無窮盡

至此則開示悟入佛知見已畢○五卽受
卽時觀世音菩薩愍諸四衆及於天龍人非
人等受其瓔珞分作二分一分奉釋迦牟尼
佛一分奉多寶佛塔

此明菩薩奉命卽受乃愍諸衆而受法施
也知音云遵佛命愍四衆八部者表受法
施下合一切衆生同悲仰也分瓔珞供佛
及塔表上合三世諸佛同慈力也天台云
以一瓔珞分二分者表事理二因供二佛
者將趣二果也理圓證法身佛事圓證報
身佛又表一行必具二因理則正因事卽
緣了理事不二故曰妙因能成法報之妙
果也不論應身者何也曰因人趣果合表
二身法報若成應用自現○六總結
無盡意觀世音菩薩有如是自在神力遊於

娑婆世界

此總結前問以荅當機也本以菩薩獲二種殊勝發三種妙用則三十二應十四無畏四不思議皆名自在神力而遊娑婆世界也但此文缺四不思議而知音謂具於四翻結荅文中初云威神之力巍巍如是次云有如是等大威神力多所饒益三曰是故娑婆世界皆名施無畏者四曰有如是自在神力所以然者以同體形咒異體形咒破慳感求供養佛生此四不思議皆大自在威神之力故此四荅攝無不盡也長行已竟

④二偈頌分三⑤一雙頌二問

爾時無盡意菩薩以偈問曰

義疏記云頌文什師不譯諸師皆謂梵本

極八

十一

中有荆溪尊者云此亦未測什師深意續高僧傳云偈是闍那掘多所譯智者出時此偈未行故無所解荆溪亦於輔行記中引還着於本人之文故知具釋理亦無妨近有天竺寺式法師分節其文對於長行問荅宛如符契故依彼分釋

世尊妙相具我今重問彼佛子何因緣名爲觀世音

此頌先歎佛德世尊萬德相好一切畢具故云妙相具我今句頌前二問以彼字該人法二種後二句單問名頌長行以何因緣名觀世音也

⑥二雙頌二荅分二⑦一經家叙荅

具足妙相尊偈荅無盡意

式師云此頌似緝綴之語宜當如來直荅

或集經者乘便頌之或掘多以偈翻之貫散隨言亦無不可④二正頌佛答分二⑤一加頌總歎行願

汝聽觀音行善應諸方所弘誓深如海歷劫不思議侍多千億佛發大清淨願

知音云汝聽者勅令諦聽總頌下合六道之願深謂聖行能應諸方雖是神通亦由深大之願所使然願深由經劫多亦不可以心思口議者次總頌上合諸佛之願淨謂經多劫發大願不可思議者由侍佛多而無染著也△諸方卽微塵國土三世間也善應者於十法界聞稱卽應也弘誓下四句文似間錯宜云發大清淨願弘誓深如海侍多千億佛歷劫不思議以願大清淨故曰如海此明願也由侍佛千億故劫

攝入

上二

量難思此明行也弘誓卽四弘誓言清淨者是不爲自求人天權小福報等

④二別頌正明二答分二⑤頌答觀世音名又二⑥一總答

我爲汝畧說聞名及見身心念不空過能滅諸有苦

式師云畧說者舉要言也聞名故稱口機也見身故禮身機也心念卽意機聞名是冥應見身是顯應諸有二十五有也△聞名卽頌前問答七難二求一稱名而得滿願也見身卽頌後問答三十二應一注念而得成就也心念二字總二答中一心稱名一心供養然稱名供養若不一心則空過處多所謂暫時不在還同死人豈能疾滅諸有苦哉又諸有若指二十五有則不

能盡十法界機然四聖流中求不遂願者亦是苦當知諸有苦卽一切苦也④二別答又二⑤一頌七難加餘就分十二⑥一頌火難

假使興害意推落大火坑念彼觀音力火坑

變成池

極六

十三

知音云此下皆申頌畧說火坑嗔所變起人以嗔害聖以慈忍故念聖力火坑而化為池此以性火真空而救之也△此科云假使後言或漂或被等皆非實有非常有事設有是事但念得彼菩薩名自不爲難此所謂感應道交之力也⑦二頌水難或漂流巨海龍魚諸鬼難念彼觀音力波浪不能沒

○巨海貪所成就貪財似龍貪姪似魚貪

殺似鬼一念聖力五欲頓息則波浪不沒此以性水真空而救之也要解云於水言漂言浪則兼風災自此至電電消散皆頌外業在長行爲十四無畏而頌文事相不同又加旁頌者十四無畏特舉大畧實具一切功德故也⑧三加頌須彌難或在須彌峯爲人所推墮念彼觀音力如日虛空住

○自高大之我慢踰於須彌我慢人人猶慢我是爲人所推墮也菩薩謙光照物故一念聖力如果日住空此以性空真覺而救之也⑨四加頌金剛難或被惡人逐墮落金剛山念彼觀音力不能損一毛

○痴惡逐人如墮金剛山無有不傷者菩薩永絕痴愛故念者得力即使墮落不能損一毛此亦性空真覺而救之也大窾引阿舍云三千大千世界復有大金剛山繞大海水金剛山外復有第二大金剛山二

極八

十四

山中間窈窕冥冥有八大地獄日月威光所不能照者是也○五超頌怨賊難

或值怨賊繞各執刀加害念彼觀音力咸即起慈心

○冤賊纏於疑暗是各執刀加害也菩薩視冤同親毫無疑害故念得力者皆起慈心而救之也

○六追頌刀杖難

或遭王難苦臨刑欲壽終念彼觀音力刀尋段段壞

○王難生於身見有此身生則有彼身死是為臨刑壽終也菩薩身見消忘故念得力者彼身見之刀即段段壞也○七追頌枷鎖難

或囚禁枷鎖手足被桎械念彼觀音力釋然得解脫

○譬邊見為桎梏也生此有無斷常等邊見為財產所囚禁妻子所枷鎖六親伎倆所桎械也菩薩邊見頓空故令持名者得解脫也

極八

十五

○八加頌咒藥難

咒詛諸毒藥所欲害身者念彼觀音力還着於本人

○咒藥等邪見所發也害人而返自害聖無邪見故令念得力者不遭毒橫也○譬

如經云有清信士初持五戒後時衰老多有廢忘爾時山中有渴梵志從其乞飲田家事忙未如所願遂恨而去梵志能起尸使鬼召得殺鬼勅曰彼辱我往殺之山中有羅漢知之往出家語云汝今夜早燃燈勤三自皈口誦守身口莫犯倡慈念衆生可得安穩主人如教鬼莫能害由不能害其鬼乃悲欲害梵志羅漢敕之令鬼不見輔行引此云正是觀音經中還着本人意

⑨九追頌羅刹難

或遇惡羅刹毒龍諸鬼等念彼觀音力時悉不敢害

○卽諸見取所與也菩薩諸見消忘故令念者得力斷諸見龍鬼則無所害也⑩十加頌惡獸難

若惡獸圖遠利牙爪可怖念彼觀音力疾走無邊方

○警戒禁取爲惡獸具利牙爪可怖也菩薩無戒禁之取着故令念者得力而持牛狗等之惡獸疾走無邊方也⑪十一加頌

蛇蝎難

蛇蝎及蝮蝎氣毒烟火燃念彼觀音力尋聲自迴去

○蛇蝎等具忿恨之惡氣毒如烟火之燒然觸之卽殺菩薩無是毒害故令念者得力諸惡蟲自迴避也⑫十二加頌雲雨難雲雷鼓掣電降雹澍大雨念彼觀音力應時得消散

○諂媚如雲之覆日悻傲如雷之震驚嫉妬人之所長求索人之所短如掣電之快

駛毫不容隱也好害人之善如電之催害物也狂言譖毀於人如澍雨之傾於物而浸潤也菩薩無是諸惡故念者得力凡遇諸害應時消散也式師云已上頌七難共爲十二不出地水火風空識之六種須彌

卷八

十六

金剛是地雲雨亦水蛇獸咒詛是有情屬識由菩薩色身旋復使求之必遂也更須知一切色心依正皆是菩薩妙色妙心衆生於聖色心中而自爲難求救之誠亦是觀音是故機成卽時能應當以此義觀之

何患不同觀音利物哉頌七難加餘已竟

⑧二頌三毒二求

衆生被困厄無量苦遍身觀音妙智力能救世間苦

前頌救諸外難此頌脫其內業良以衆生

卷八

十七

爲貪嗔等十結使於三界中妄作妄受六凡爲魔惑所纏四聖由細惑所蔽惑之愈細不同而輕重衆苦逼迫則一也故曰無量苦遍身凡此衆機菩薩以妙智神通之力於三世間中無不能救也則此中衆生與世間皆具十法界義頌答觀音名已竟

⑨二頌答普門示現分二④一正頌示現

又二⑤一起頌總答

具足神通力廣修智方便十方諸國土無刹不現身

此頌長行總答以種種形遊諸國土等直指云亦是廣讚觀音神通智慧方便皆悉具足乃能於十方國土普應群機以示圖行等虛空界之相

⑩二追頌別答分三⑥一頌身業普應

種種諸惡趣地獄鬼畜生生老病死苦以漸
悉令滅

式師云長行中別列諸身身皆三業頌中
三業別示而業周遍見頌之功也此頌身
業普應合具十界今止示三途以劣况勝

也九界二死皆有四相漸漸令滅歸於常
寂斯亦觀音之妙用也長行中未見現地
獄等身頌文補之②二頌意業普觀分二
①一明本觀慈悲

真觀清淨觀廣大智慧觀悲觀及慈觀常願
常瞻仰

此頌妙行之體觀字當作平聲屬根本智
要解云真以息妄淨以治染智以破惑悲
以拔苦慈以與樂以是五觀加被羣迷故
妄染惑苦應念消滅所以樂當瞻也大竅

極八

六

云真觀觀聲聞根清淨觀觀緣覺根廣大
智觀菩薩根悲觀下合衆生慈觀上同諸
佛具此五觀觀五衆機念念不離故應常
瞻仰也△此頌答普門示現其實顯菩薩
上合諸佛本妙覺心以此五觀名異體同
而實卽是本妙覺心體用兼至所以能於
十方微塵國土現種種身說種種法如月
臨空無所不應也②二明智光徧照
無垢清淨光慧日破諸暗能伏災風火普明
照世間

光乃發之於外用也能破暗伏災顯大用
無限用既大而體必周所以曰無垢曰清
淨曰慧日者體不離本妙覺心也雖然現
十界身雲其實二俱不着故慧日光明得
無垢清淨以應無盡意之當解瓔珞觀世

音之不受而奉上如來也諸暗乃三惑無明卽內障災風火意含多種卽外障內外障除大千洞照故曰普明照世間④三頌口業普說

悲體戒雷震慈意妙大雲澍甘露法雨滅除

十八

十九

煩惱燄

式師云說雖惟口必假身意爲受法之本爲法現形本期救苦故名悲體說法必以戒行爲先故曰戒雷震菩薩興無緣慈濟作不請之談無物不覆無機不被故曰慈意妙大雲也甘露乃諸天不死之神藥也所宣至理解必無生若非無生焉能不死於慈雲中注大法雨衆生受之三惑燄滅故曰澍甘露等大雲是慈悲普注雨是說法普滅燄是利益普正當頌普門義也⑤

二加頌顯機

靜訟經官處怖畏軍陣中念彼觀音力衆冤悉退散

式師云前長行三業顯應以被冥機疏以施瓔珞彰顯機義今重頌普門示現中有此念觀音之人亦顯機也蓋見天台冥契聖旨事係訟庭身臨戰陣心憂刑罰命慮兵殘今昔冤仇此時合會但一心致感而衆難皆祛也雙頌二答已竟

⑥三雙頌二勸分二⑦一頌勸受持又二

⑧一明境智深妙以勸常念

妙音觀世音梵音海潮音勝彼世間音是故須常念

說法不滯爲妙音尋聲救苦爲觀音音性無着爲梵音應不失時爲海潮音具此所

以勝世間音也直指云此承上常願瞻仰而來畢竟教人瞻仰者爲菩薩境智深妙雖隨類現身隨機說法而更真俗雙融故曰妙音外觀九界之音不逐聲流轉返觀觀者卽令彼解脫於已則不着法故以梵

極大

三十

議中之施無畏皆觀世音之力也十四無畏中之除三毒四不思議中之破慳慳皆梵音之力也三十二應中之赴徧求十四無畏中之赴二求四不思議中之赴廣求皆應不失時潮音之力也以持觀音一名而勝六十二億恒河沙法王子名卽勝彼世間音也故前以一觀而爲五觀觀無異觀今以一音而爲五音音無二音以不異之觀觀不二之音則境智俱深非心可測也

極大

三

④二明感應難測以勸勿疑
念念勿生疑觀世音淨聖於苦惱死厄能爲作依怙

且菩薩不唯觀聽返入離諸塵妄兼之三空越而二死脫於聖類身可謂淨矣惟其

淨聖故能隨類應感使一切分段變易生死之厄龕細塵惑之苦凡有希求靡不成就故能於九界衆生爲依爲怙所以力勸持名而勿疑也前云念念不空過能滅諸有苦此言念念勿生疑能爲作依怙然纖疑在念則本體觀音聖不淨矣聖不淨卽爲空過於生死中而失父母則無可依怙者也⑤二頌勸供養

具一切功德慈眼視衆生福聚海無量是故應頂禮

要解云具一切功德則所求必應不止十四無畏也慈眼視衆生則無所不度不止三十二應也其福聚如海利澤無窮故應皈命頂禮也偈頌已竟

⑥三得益分二⑦一持地歎功德

爾時持地菩薩卽從座起前白佛言世尊若有衆生聞是觀世音菩薩品自在之業普門示現神通力者當知是人功德不少

知音云前以無盡意當機明耳根圓通持經其意無盡也今以持地結證顯圓通無盡之意不離一切衆生常住心地也○寶雲經云地有十義得名一者廣大二衆生依三無好惡四受大雨五生草木六種子所依七生衆寶八出諸藥九風不動十獅子吼不能驚菩薩亦爾故名持地式師云聞是觀音等是聞初翻冥益問答也普門示現等是聞次翻顯益問答也自在業者卽不思議力用也△當知功德不少有況顯意然聞有菩薩此普門示現之神通者而功德尚是無量況受持名者供養形者

極八

三三

讀誦解說書寫此普門示現經者則其福
倍倍轉增益不可量也④二聞品獲利益
佛說是普門品時衆中八萬四千衆生皆發
無等等阿耨多羅三藐三菩提心

此經家叙置印證持地功德不少之文無
等者卽物無與等稱無上者下等字卽與
物爲等正等覺義也然物無與等而又能
與物爲等此如來最上德也觀音體此而
成普門行隨類應化與物爲等故聞其風
者皆能發如是心此所謂以圓行成最上
德也觀音普門示現周徧流通已竟

妙法蓮華經授手卷第七之三

卷八

五

音釋

家

音姑

掘

渠切

勿

諧

側聲

廉

切

舊

去

仇

渠求

尤

切

音

也

妙法蓮華經授手卷第七之四

極九

清楚衡雲峰沙門智祥集

陀羅尼品第二十六

品節云此品由前妙行已圓當克妙果第
藏識幽深歷劫餘習潛伏其中雖有止觀

極九

一

之功而智有所匡神有所不及者若非神
咒加持不易斷也故有後三品三種加持
也一神力二法力三現身面言說楞伽惟
一今多法力此品正神力加持也以咒乃
諸佛秘密心印如天子秘符大將執之無
敵不克况藏識爲生死窟穴最極幽深習
氣潛伏止觀之力所不及者必須仗如來
秘密心印之力以攻之所以楞嚴云若修
行人習氣未除應當誦我神咒是也楞伽
亦云若不以神力建立者則墮外道惡見

妄想及諸聲聞衆魔希望故七地已前不
加則墮外道八地不加則墮二乘九至等
覺不加不得入妙故修行者所當加也大
寂云自地湧菩薩持經如來囑累心事已
竟復恐諸菩薩久居下界常處空閑初入
塵寰利生接物難堪難忍故復將此界他
方諸大菩薩所證法門一一拈出如藥王
之忍辱妙音之法空觀音之慈悲與彼下
方菩薩恒爲模範若忍辱而不得法空則
心量不廣若證法空而不行慈悲則教化
不圓必須入此三種法門方得流通此經
不斷持經典型也而復加此品者正恐末
世邪師熾盛魔事實多使持經難爲廣益
故諸菩薩說咒護持不令侵毀此法師者
益見諸菩薩慈悲無盡也要解云陀羅尼

此云總持卽念慧妙力諸佛密語有一字多字無字之異能以一字總無量法持無量義摧邪立正殄惡生善皆能總而持之之謂也△凡佛說法必兼顯密二門顯以生慧密以得福施此二門使修學人福慧齊到也如世醫人或顯說方或密授藥其瘳病之驗一也然咒者祝也使持咒人念念無間祝邪者正祝染者淨祝迷者醒祝凡者聖無不遂其心滿其願也咒語或諸佛弘名或神王聖號持其佛名神鬼擁護持其王名神鬼皈崇必至受持者福智莊嚴而永無魔事也又神咒乃諸佛密語非心識可能測知故曰是大神咒無等等咒於五不翻中乃秘密不翻不唯凡者不知其實下位菩薩不識上位密語此皆從如

來不思議妙智流出宜敬心奉持焉④四以衆聖神咒加持堅固流通分四⑤一問持經功德

爾時藥王菩薩卽從座起偏袒右肩合掌向佛而白佛言世尊若善男子善女人有能受持法華經者若讀誦通利若書寫經老得幾所福

此是藥王欲使此經流通不盡故致此問也直指云此品復以藥王當機是以諸佛心光爲藥守護地前信等五位治五蘊結三使微細煩惱之病然又以持經功德爲問者是欲爲發心說咒之端也△此問非從前泛常所謂受持者言讀誦通利是得證法身之人讀誦若不通利去佛尚遠雖有福利猶不足較書寫卽註釋是經能註釋

者神入佛心深契妙理當爲神咒之所守護者也故問得幾所福^②二答功德無量佛告藥王若有善男子善女人供養八百萬億那由他恒河沙等諸佛於汝意云何其所得福寧爲多不甚多世尊佛言若善男子善女人能於是經乃至受持一四句偈讀誦解義如說修行功德甚多

此如來答得多福明識藥王之心普也八百萬億下舉多佛是因勝能供如是多佛是福廣以此勝田廣福較一持四句偈者之功德不可比也何故佛雖多供雖廣事也持經者不惟徒誦而又能解義不獨解義而又能如說修行解義者心悟實相修行者妙契法身如此等福寧有量哉四句者不必定指須知全經字字皆佛心光受

持讀誦一句一字者無不獲益所謂析梅檀片片皆香也

③三請以說咒護分五④一藥王請說分四⑤一求請說

爾時藥王菩薩白佛言世尊我今當與說法者陀羅尼咒以守護之

前校功德處以受持讀誦書寫爲問今說咒處又以說法者爲言乃前後互彰也非說法者無功而受持書寫者咒不護也⑥

二正說咒

卽說咒曰

唵

四

安爾 曼爾 摩禰 摩摩禰 旨隸 遮黎第 賒咩 賒履多瑯 羶帝 目帝 目多履 娑履 阿瑯娑履 桑履 娑履 义裔 阿义裔阿耨臘 羶帝 賒履

陀羅尼

阿盧伽婆娑

蘇本切

簸蕪毘叉膩

彌毘剎

阿便哆邏彌履剎

阿宜哆波隸

輸地

歐究隸

牟究隸

阿羅隸

波羅

隸

旨迦差

初凡切

阿三磨三履

佛陀毘吉

利表帝達磨波利差帝

僧伽涅槃瞿沙彌

婆舍婆舍輸地

曼哆邏

曼哆邏叉夜多

郵樓哆

郵樓哆憍舍畧

惡叉邏

惡

叉治多治

阿婆盧

阿摩若那多夜

天台云咒是諸佛密語如王索先陀婆無

有能識惟有智臣乃能知耳洗時奉水飯

時奉器食時奉鹽遊時奉馬咒亦如是祇

是一法徧有諸力病愈罪除善生道合爲

此義故皆存本音又孤山所引四悉檀釋

一世界悉檀隨方異說令生歡喜益二爲

人悉檀令生善益三對治悉檀令破惡益

第九

五

四第一義悉檀令入理益悉者徧也檀者

施也謂聖人以此四種徧施衆生也○入

理者意欲令人人入佛知見所謂惟一大

事因緣也破惡者倘人未能悟入且與第

二斷除煩惱種習故云破惡其人又未能

破惡且與第三令其生起善心建立善事

善力漸生惡習自退故曰生善其人又未

能興善且與第四令生歡喜種少善根爲

上三種作遠因緣故云歡喜益也今以咒

論四悉檀者從劣向勝如持咒脫難求財

等既遂其心無不歡喜此世界悉檀也又

持咒求戒求慧者無不滿願善法成就卽

爲人悉檀也持咒者斷除三毒惡業消除

卽對治悉檀也又以持咒求證菩提入諸

三昧而得成就卽第一義悉檀也大端明

四悉檀秘密利益非如顯說可知其故若可測知又何以謂神咒也行人但當一心諦信則所有願求無不遂意

⑤ 三歎護持

世尊是陀羅尼神咒六十二億恒河沙等諸佛所說若有侵毀此法師者則爲侵毀是諸佛已

此歎咒力不可思議咒既出於六十二億諸佛所說則藥王亦代佛宣揚也若有下明非人不可侵毀然則經是顯咒咒是密經持經者卽持咒也經咒在處卽佛現在所以侵持經人卽毀諸佛矣

⑥ 四佛印可

時釋迦牟尼佛讚藥王菩薩言善哉善哉藥王汝愍念擁護此法師故說是陀羅尼於諸

衆生多所饒益

此如來喜法流通故極口稱讚也大藏云既於惡世不惜身命護持此經而又愍念持經法師說咒真加令彼諸魔不敢侵凌毀謗是亦能以無畏施無量衆生矣此藥王能止衆病者也

⑦ 二勇施請說分三 ⑧ 一求請說

爾時勇施菩薩白佛言世尊我亦爲擁護讀誦受持法華經者說陀羅尼若此法師得是陀羅尼若夜叉若羅刹若富單那若吉蔑若鳩槃荼若餓鬼等同求其短無能得便

藥王說咒故以瘞衆生之心病則藥王於此經致力大矣今復勇施請說亦是本會上首故妙音諸娑婆禮觀釋迦而必欲見文殊藥王勇施者藥可見也前藥王云我

與說法者陀羅尼今勇施云我與受持者
陀羅尼是於六種法師中前後互出也富
單那此云臭餓鬼主熱病鬼也吉蔑此云
所作卽起尸鬼也鳩槃荼舊名冬瓜由陰
如冬瓜行置肩上坐便踞之卽魘魅鬼也
凡此諸鬼皆惱害人有此咒力不得其便

⑤二正說咒

卽於佛前而說咒曰

座隸 摩訶座隸 郁枳 目枳 阿隸
阿羅婆第 涅隸第 涅隸多婆第 伊緻
柅 常緻柅 旨緻柅 涅隸埤柅 涅埤
埤婆底

⑥三歎護持

世尊是陀羅尼神咒恒河沙等諸佛所說亦
皆隨喜若有侵毀此法師者則爲侵毀是諸

佛已

此先歎咒力亦皆隨喜者此咒是諸佛所
說卽諸佛亦順此咒而生歡喜也次歎護
持不致令侵毀法師也⑦三多聞諸說
爾時毘沙門天王護世者白佛言世尊我亦
爲愍念衆生擁護此法師故說是陀羅尼
大論云毘沙門此云多聞福德之名聞四
方故居半須彌北水晶埵主夜叉羅刹二
部光明疏云西域以北方爲首次東南西
故先舉此

卽說咒曰

阿黎 那黎 菟那黎 阿那盧 那履
拘那履

世尊以是神咒擁護法師我亦自當擁護持
是經者令百由旬內無諸衰患

說咒而又自護是受囑深而悲救切也百
由旬內顯驅邪之力廣凡一人居此持
說修行爲人演說不惟邪不入身而亦使
不能入境邪惑既離哀患何至④四持國
請說

極九

八

爾時持國天王在此會中與千萬億那由他
乾闥婆衆恭敬圍遶前詣佛所合掌白佛言
世尊我亦以陀羅尼神咒擁護持法華經者
大論云梵語提頭賴吒此云持國以能護
持國土故又云安民爲上升之元首乃下
界之初天居半須彌東黃金埵主乾闥婆
毘舍闍言在會者以護法闍經故恒不離
也蓋天人乘急戒緩處處聞經無不在會
乾闥圍遶是主臣隨至也言我亦者謂不
但前天我亦說之也一以受佛付囑一以

不忘本願所以當爲護持也此旣言東北
而西南已攝其中非祇二天獨說也
卽說咒曰

阿伽彌 伽彌 瞿利 乾陀利 旃陀利
摩蹬耆 常求利 浮樓莎柅 頰底

世尊是陀羅尼神咒四十二億諸佛所說若
有侵毀此法師者則爲侵毀是諸佛已

藥王勇施皆言咒爲恒沙佛說而多聞不
言所說惟持國祇言四十二億者足見菩
薩因行廣遠侍佛必多而天王宜乎祇四
十二億也

極九

九

⑤五諸女請說分五⑥一列名

爾時有羅刹女等一名藍婆二名毘藍婆三
名曲齒四名華齒五名黑齒六名多髮七名
無厭足八名持瓔珞九名臯帝十名奪一切

衆生精氣是十羅刹女與鬼子母并其子及眷屬俱詣佛所

要解云害人之鬼無甚於羅刹女鬼子母等今既誓護持則餘神可知故王道興而守在四夷佛道備而防在魔外也晉譯云一名有結縛二名離結三名施積四名施華五名施黑六名被髮七名無着八名持華九名何所十名取一切精教中謂鬼子母有九十一子及眷屬者則羅刹女與鬼子母各各眷屬也⑤二請說

同聲白佛言世尊我等亦欲擁護讀誦受持法華經者除其衰患若有伺求法師短者令不得便

法師短者卽心念中稍有空處偶一時忘照而邪得其便然邪之與正如明暗然明

少退而暗便興此所以伺得其便也伺求得遂衰患隨興故知念念不空過能滅諸有苦亦非外得

卽於佛前而說咒曰

伊提履 伊提泥 伊提履 阿提履 伊

提履 泥履 泥履 泥履 泥履 泥履

樓醯 樓醯 樓醯 樓醯 多醯 多

醯 多醯 兜醯 炎醯⑥三明護

寧上我頭上莫惱於法師若夜叉若羅刹若餓鬼若富單那若吉蔗若毘陀羅若犍馱若

⑨

+

烏摩勒伽若阿跋摩羅若夜叉吉蔗若人吉蔗若熱病若一日若二日若三日若四日若至七日若常熱病若男形若女形若童男形若童女形乃至夢中亦復莫惱

此正出其所護之心至誠至切也寧上我

頭者況其持經者不可惱亂人之頭面極爲尊貴而女人猶以此爲鍾愛者且鬼以嗔毒爲懷尚無敢犯其嗔寧敢犯彼之頭面哉故此況云我頭可上法師不可惱也毘陀羅赤色鬼健陀黃色鬼烏摩勒黑色鬼阿跋摩青臉鬼夜叉與人吉遮者謂此鬼此人皆能爲起尸也若熱下謂鬼之害人有間者自一日或至七日無間者則常爲病男女下明鬼之變相也乃至夢中者謂持經者有此咒力則卧安覺安無不適意也

卽於佛前而說偈言

若不順我咒惱亂說法者頭破作七分如阿梨樹枝如殺父母罪亦如壓油殃斗秤欺誑人調達破僧罪犯此法師者當獲如是殃

誓言

知音云此述不順命者得五逆罪阿梨樹此云蘭香藉其枝墮地自成七段敢犯法師者頭破如之如殺父母二逆罪也壓油者外國壓油之法擣麻使生蟲蟲多益肥則壓之是殺命之衆三逆罪也斗秤欺誑謂小出大入也此方率以爲常西域其嚴戒者四逆也破僧罪者破和合僧也謂調達妄構五法誘佛五百新衆而行是五逆也事出科註所引甚明茲不繁錄次總結云犯此法師者當獲如是五逆罪也④四

諸羅刹女說此偈已白佛言世尊我等亦當身自擁護受持讀誦修行是經者令得安隱離諸衰患消衆毒藥

觀前之寧上我頭及此中身自擁護之言

益見諸女忘身爲法之誠此或諸大菩薩示身而引同類不然其誠懇何其乃爾^(四)

五佛讚

佛告諸羅刹女善哉善哉汝等但能擁護受持法華名者福不可量何況擁護具足受持供養經卷華香瓔珞末香塗香燒香幡蓋伎樂燃種種燈蘇燈油燈諸香油燈蘇摩那華油燈蔞蔔華油燈婆師迦華油燈優鉢羅華油燈如是等百千種供養者臯帝汝等及眷屬應當擁護如是法師

此結讚能護者功德大也文有四節一但能護持名者福不可量二況顯擁護具足受持者其福猶不可量三復能擁護種種供養者四召名珍重如法擁護十羅刹女中獨呼臯帝準晉譯名何所者是無所不

具之義此必福智超勝於衆故如來特召令統其同例及眷屬作擁護也○藕摩那卽須曼那華也婆斯迦卽波利師迦優鉢羅卽青蓮華請說咒護已竟^(四)四聞品得利益

說是陀羅尼品時六萬八千人得無生法忍此六萬人聞陀羅尼證無生忍多是積劫承秘咒功能熏習所至今一聞宣演直證無生則秘密功能其益人之不可思議正如醫人不顯說方法但以一丸授彼令服病卽消除也神咒加持堅固流通已竟妙莊嚴王本事品第二十七

品節云此品意明轉識成智之象以顯法力加持也莊嚴王乃如來在纏爲八識心王之名二子乃六七一識轉染令淨之象

夫人乃柔順內助爲止觀內熏之體淨治無明故名淨德二子先已出家以六七因中轉故二子轉父邪心一同出家正顯本覺出纏之象也然此止觀之力乃法身菩薩得無分別心與諸佛智用相應依法力

極元

十三

修行真如熏習滅無明故是所謂法力加持也大藏云藥王本事是顯藥王因中求法供佛之德本此品雖名莊王本事實顯藥王藥上度生之善功也知音云莊王乃華德菩薩前身不言華德本事者以因名成果德彰持此經者因該果海也由華德曾問妙音因地故今爲彼說其本事天台云昔有四比丘結契山林精持妙法以餒乏故一人分衛見王者出遊忽生愛着由功德熏修隨念受報人間天上常得爲王

其三友得道欲救其失以其邪着非愛緣無能感動於是一爲端正婦二爲聰明兒托生設化轉其邪心令歸正覺今叙本事欲使行人以道自衛外防見魔內絕惡覺消息邪緣入佛知見此實諸佛究竟進修最後垂範如楞嚴法會將終說過去佛覺明分析微細魔事使行人諸識心垢洗除與此同意⑤五由莊王出陳本事轉邪流通分六⑥一特明事本

爾時佛告諸大衆乃往古世過無量無邊不可思議阿僧祇劫有佛名雲雷音宿王華智多陀阿伽度阿羅訶三藐三佛陀國名光明莊嚴剎名喜見

前品藥王雖引天神等說咒護持此經尚隱而未顯今又假莊王本事因二子神力

以轉邪心則是藥王顯然以身擁護也然能使轉邪歸正令王與後官皆悉堪任受持法華經者藥王力也經云淨眼菩薩於法華三昧久已通達故知藥王於此經悲救之切護持之至故如來不待請而自說

極九

十四

莊王本事其實亦即藥王之本事也乃往古下據理顯妙法之無始佛名雲雷音宿王華是雙舉妙音因果所觀之佛乃顯妙法莊嚴因果如不二之體也國名光明莊嚴示大圓鏡之境也劫名喜見示一真

法界之相也○二雙標能所

彼佛法中有王名妙莊嚴其王夫人名曰淨德有二子一名淨藏二名淨眼是二子有大神力福德智慧久修菩薩所行之道所謂檀波羅密尸羅波羅密羼提波羅密毘離耶波

羅密禪波羅密般若波羅密方便波羅密慈悲喜捨乃至三十七品助道法皆悉明了通達

知音云彼佛下具大事因之人以前之王卽今之華德也其王下成大事緣之人前之夫人二子卽今之光照莊嚴相與藥王藥上也作大事因緣訓者準後文善知識者是大因緣故是二子下叙所以能成大事因緣者以具神力及福智故所謂下釋福智十度此中具七前五度福德後二度

極九

十五

權實二智也三十七品者謂四念處四正勤四如意足五根五力七覺支八正道皆是助成無上菩提之道直指云當人於無始已前一念背覺遂成無明心王故引莊王而表八識也夫人表五識淨藏淨眼表

六七二識八識染以二十五有莊嚴淨以權實二智莊嚴五識與八識同體非造所造故名淨德能生育萬善有夫人義七識染污轉則成平等性智故名淨藏六識分別十界依正轉則成妙觀察智故名淨眼二子有大神力久修行者謂六七因中先轉也

又得菩薩淨三昧日星宿三昧淨光三昧淨色三昧淨照明三昧長莊嚴三昧大威德藏三昧於此三昧亦悉通達

要解云淨三昧淨藏淨眼之所本也日星宿表根本差別二智之照用也淨光能現衆像淨色不爲形礙淨照照了萬法長莊嚴非素法身大威德藏具大神用知音云前已釋福德智慧今正釋神力以凡神力

皆由三昧而成神力卽下十八變等三昧七種下文次第自訓於此三昧者卽指上七種照前段六度四攝等法云皆悉明了通達故此結於諸三昧亦悉通達也

④三能化方便分三⑤一明時至

爾時彼佛欲引導妙莊嚴王及愍念衆生故說是法華經

○彼佛出世常宣正法於王緣弱則非其時今說法華是其時矣故云引導又云愍念衆生則知非獨爲莊王說此妙法也⑥

釋九

十六

二出論議分四⑦一白母時至

時淨藏淨眼二子到其母所合十指爪掌白言願母往詣雲雷音宿王華智佛所我等亦當侍從親近供養禮拜所以者何此佛於一切天人衆中說法華經宜應聽受

○先白母者據其本實母子元知今爲化

儀機熟應發正是槌磑相扣物器方成也
知音云淨藏謂淨如來藏之三性淨眼乃
淨如來之五眼經以二淨字釋成二王子
得菩薩淨三昧之名也不先白父而白母
者維摩經云智度菩薩母方便以爲父善
根成實男今妙莊嚴旣以方便爲二菩薩
父示墮邪見然非先智度則邪見莫除淨
德雖爲二菩薩母然非先善根成實則智
慧何興故經上節叙六度訖復叙方便波
羅密此節叙二王子得淨三昧先白其母
意有在也勸母往聽照隨喜品勸人往聽
得與陀羅尼菩薩共生一處之功德也

◎二母遣化父

母告子言汝父信受外道深著婆羅門法汝

極九

七

等應往白父與共俱去

外道者不達惟心之理從心外強修者也
婆羅門法者西域九十六種惟佛一種爲
正餘皆名邪應往白父與俱去者知音謂
男女不得雜處况國母爲世儀型不先奏
準詎敢擅便故云汝父信受等此又見持
經者雖有善根智慧苟無方便亦不能得
證妙法也◎三怨生邪見
淨藏淨眼合十指爪掌白母我等是法王子
而生此邪見家

知音云雖爲白母嘆傷之辭其實明二菩
薩得日星宿三昧也△佛智如日世智如
星今怨生邪見是覺破世間智不及佛智
由菩薩二智俱融故謂得日星宿三昧也
直指云五識因六七二識休息乃於二六

時中理觀內燭始知八識習氣濃厚必用六七採集種智之藥念念內熏乃空賴耶種子蓋五八同體必不親緣真如故以母勸子念父表之如五識頌云果中猶自不詮真也父信外道指賴耶我法二執名外道法與共俱去者表五八同轉也子怨生邪表六七因五識轉始見八識過患此是一位證一位工夫非彷彿之詞

④四母囑當念

母告子言汝等當優念汝父爲現神變若得見者心必清淨或聽我等往至佛所

徒自憂念於事無益既憂念父當現神變使伊見而醒悟則有補於行也直指云此理智觀行互嚴之相⑤三現化身

於是二子念其父故涌在虛空高七多羅樹

五九

十八

現種種神變於虛空中行住坐卧身上出水身下出火身下出水身上出火或現大身滿虛空中而復現小小復現大於空中滅忽然在地入地如水履水如地現如是等種種神變令其父王心淨信解

知音云此雖叙二子奉慈旨以現神變照前文有大神力其實明二菩薩得淨光淨色二種三昧也以所現神變總不出地水火風空見識七大所變之光色故十八變者身上下各出水火爲四兩脇各出水火爲四共八變九履水如地十入地如水十一從空沒而復在地十二從地沒而復處空又於空中行住坐卧爲四兼前成十六復現大小身共十八變也直指云此表六七已轉十八界之相然不與八識同轉而

六七轉者爲八識本體原淨所有種子皆六七所積故須是六七知非方可轉也能化方便已竟

④四所化利益分十⑤一信子伏師

時父見子神力如是心大歡喜得未曾有合

掌向子言汝等師爲是誰誰之弟子二子白

極九

十九

言大王彼雲雷音宿王華智佛今在七寶菩提樹下法座上坐於一切世間天人衆中廣說法華經是我等師我是弟子父語子言我今亦欲見汝等師可共俱往

知音云方便之父不出智母所料則權符其實故問師之爲誰二子白言下雖是叙答父王之辭其實明二菩薩得淨照明三昧也是以淨佛法而照明父王之信心故寶積第三經云菩薩成就三法得不退轉

於阿耨菩提父母不信令其生信一也父母毀戒令其住戒二也父母慳貪勸令住施讚歎菩提三也今二菩薩正是其人○問品中曾未叙二子先以佛爲師今奚云是我等師答經雖未叙其義暗合前文云久修菩薩之道旣云久修焉知不爲彼佛弟子問二子旣有如上神通奚不卽以神力度王必爲子耶答二菩薩於王有子之緣而亦是父子情同爲信易生也⑥二稱慶願放

於是二子從空中下到其母所合掌白母父王今已信解堪任發阿耨多羅三藐三菩提心我等爲父已作佛事願母見聽於彼佛所出家修道爾時二子欲重宣其意以偈白母願母放我等出家作沙門諸佛甚難值我等

隨佛學如優曇鉢華值佛復難是脫諸難亦難願聽我出家母卽告言聽汝出家所以者何佛難值故

二子覆母命復從空下故知前對父辭猶處空未下觀莊王合掌向子則向字猶相

極九

二十

去七多羅樹也父王已信解者謂母命我等現通化父今父見神變則往昔之心降降復起矣於無上正等覺心已堪任能發善心既生邪心已除而我等化父之能事畢矣但今願母見聽宜速出家故復說偈

云願母放我等出家作沙門大窾云放字作上聲讀猶効也此說方是有云作不留之意似與前後文義欠妥前云二子久修菩薩所行之道故莊王亦言汝等師爲是誰誰之弟子則見二子已出家矣後云莊

王與群臣眷屬俱夫人與采女眷屬俱此正是引父母出家之實若但言放我等二人出家則是父母俱不出家矣我等隨佛學者是勸父母同修梵行之言如優曇下喻佛之難值優曇華三千年尚有可待而

值佛之難則果難矣何也輪王雖聖尚且輪迴若得遇佛衆苦皆脫也前來率母見佛而母不輕諾者以父邪未轉今王既見信於子故母亦得見許於子故曰聽既佛難值遇我必當出家矣然佛難值故四字

極九

主

當味所以智度之母非善根成實之男不能發起也④三重明難值

於是二子白父母言善哉父母願時往詣雲雷音宿王華智佛所親近供養所以者何佛難得值如優曇鉢羅華又如一眼之龜值浮

木孔而我等宿福深厚生值佛法是故父母當聽我等令得出家所以者何諸佛難值時亦難遇

父邪既轉母亦見聽而二子之誠意始遂至此則雙白父母催其速出是踐前言放我等出家之意所以下再申偈中諸佛難值一句又如下再申脫諸難亦難之句阿舍經云須彌山下有一眼之龜大海之中有一孔之木龜得木可以得達彼岸而免沉溺之患然一投不及必待浮木繞山三千年而復值木一孔喻佛法一乘龜一眼喻衆生偏見以偏見值一乘一投不及萬劫難逢知音云此雖請父母踐前言出家其實明二菩薩得第六長莊嚴三昧也以王及夫人二子先世爲僧莊嚴佛法今生

復求出家是長莊嚴義直指云此喻五八二識深遠實際故地地克志進前必假六七催發故也我等宿福深厚者意在冥發達因若非先世受持法華焉得此生復值佛法是故父母宜當出家何故以佛之難值不止優曇華也時之難遇不啻浮木孔也是故的故字最重意要莊王發宿命通知前世一念妄動耽王樂而至墮邪見陰狗如此也④四化功已著

彼時妙莊嚴王後宮八萬四千人皆悉堪任

標九

壬三

受持是法華經淨眼菩薩於法華三昧久已通達淨藏菩薩已於無量百千萬億劫通達離諸惡趣三昧欲令一切衆生離諸惡趣故其王夫人得諸佛集三昧能知諸佛秘密之藏二子如是以方便力善化其父令心信解

好樂佛法

此方顯昔緣成熟皆是菩提眷屬所謂大家團圓頭共說無生話也天台云法華三昧者攝一切法歸一實相離惡趣者一往以三途爲惡趣具論二十五有皆乖真起妄悉是惡趣今皆離之卽是破二十五有也諸佛集者卽三德秘密之藏佛集其中也知音云二子如是下雖結上文其實明二菩薩得第七大威德藏三昧也以廣大威德皆藏於子道中矣○此申明已轉之相八萬四千人表八識中我法二執已成全體大用故曰皆悉堪任六識至八地開佛知見故曰淨眼已證十界十如之理故曰通達法華六識頌云遠行地後純無漏觀察圓明照大千是也七識至八地賴耶

極大

三三

種子已喪故曰淨藏自三賢位已離三界生死染汚之習故曰通達離惡三昧而復能現他受用身應十地機故云令一切離惡趣也五識至八地轉成所作智同證諸佛無生法忍返觀覺體具足如來智慧德相故曰得諸佛集三昧也自八地而望九十二地及等妙極果一切種智皆悉現前故曰能知諸佛秘密之藏

⑤五俱詣佛所分二⑥一見佛而得法力於是妙莊嚴王與羣臣眷屬俱淨德夫人與後宮采女眷屬俱其王二子與四萬二千人俱一時共詣佛所到已頭面禮足繞佛三匝却住一面爾時彼佛爲王說法示教利喜王大歡悅

此叙王等受二子化導踐見佛聞法之言

以明二子具足菩薩所行之道故令父母
證得檀波羅密也各攜眷屬一時詣佛者
所謂轉則同轉而體用俱到也然修敬畢
而却住一面者正待本覺開彰而成法利
也下言彼佛爲王說法竟不出其所演者
何經而謂示教利喜者卽是爲說此妙法
也乃結前二子所對今在七寶菩提樹下
廣說法華經是我等師之語也王大歡悅
者向聞子言難值之佛如優曇華難聞之
時如浮木孔今一旦聞見俱妙宜應慶幸
無量故知前見二子神力雖曰心大歡喜
是淨藏之初開淨眼之初明見聞尚在彷
佛所以卽問誰爲師誰之子也今所言大
歡悅者乃親見親聞也⑤二興供而增瑞
應

極九

三

爾時妙莊嚴王及其夫人解頸真珠瓔珞價
直百千以散佛上於虛空中化成四柱寶臺
臺中有大寶牀數百千萬天衣其上有佛結
跏趺坐放大光明爾時妙莊嚴王作是念佛
身希有端嚴殊特成就第一微妙之色

知音云王等因聞法喜捨身莊嚴行檀度
也瓔珞成四柱臺表卽檀度具四無量心
兆王他日得佛之依報也以牀爲坐卧所
依衣爲行住所依故其上有佛卽雲雷音
之化身坐於臺上者爲後王升虛空之案
兆王他日得佛之正報也王作念等乃爲
後讚佛相好之案亦爲後捨位出家之兆
也○瓔珞供佛表行歸於理成四柱臺者
表圓行於法性空中而成四智卽莊王淨
德淨藏淨眼也而四智中本具法空之座

忍辱之衣由此四智圓融則本覺之佛放
大光明所謂大圓無垢同時發普照十方
塵刹中也以上是如來引莊王一生取證
四智三身以證當人於一念中具此妙法
耳

極元

丁丑

第六佛與授記

時雲雷音宿王華智佛告四衆言汝等見是
妙莊嚴王於我前合掌立不此王於我法中
作比丘精勤修習助佛道法當得作佛號娑
羅樹王國名大光剎名大高王其娑羅樹王
佛有無量菩薩衆及無量聲聞其國平正功
德如是

王未出家而便得記者由見佛聞法卽作
是念佛身希有端嚴殊特成就第一微妙
之色便有希望成佛之志則隱然有佛道

誓成之四弘願也而此之志人無能知故
佛特爲明告以授成佛之顯記亦表卽俗
而明真也然後作比丘精勤修習助宣道
法是滿足福智二嚴方得成佛佛號娑羅
樹王者取其廣被羣生無所不蔭也國名
大光乃破諸一切不善之暗也剎名大高
王乃超諸高貴而得自在也次記菩薩聲
聞無量者由今日一念淨信風化臣妾使
皆得法喜成廣蔭也其國平正者由捨諸
邪見直取菩提必無不平之想也梵語娑
羅此云堅固⑦七出家修行
其王卽時以國付弟與夫人二子并諸眷屬
於佛法中出家修道王出家已於八萬四千
歲常勤精進修行妙法華經過是已後得一
切淨功德莊嚴三昧

以國付弟是捨家出家厭塵勞而忻佛道也弟乃副貳之名則應緣赴物皆第二頭也八萬四千歲修行法華所以淨治塵勞也過是已後謂塵勞既淨則三昧現前遂轉邪見染莊嚴爲功德淨莊嚴也④八稱

極六

三六

歎二子

卽升虛空高七多羅樹而白佛言世尊此我二子已作佛事以神通變化轉我邪心令得安住於佛法中得見世尊此二子者是我善知識爲欲發起宿世善根饒益我故來生我家

由精進修行此經故得禪定以定故發通卽能升虛空也向佛稱歎二子者由今具定發通知宿世事而昔時結契之原委始知矣由是知二子過去修習此經致有如此

是神變爲欲起我宿世修習此經所植善根而饒益於我則二子實我真善知識也此是莊王欲引起宿王智佛顯二菩薩深本以完藥王修習此經之深心本願也⑤九佛述行高

爾時雲雷音宿王華智佛告妙莊嚴王言如是如是如汝所言若善男子善女人種善根故世世得善知識其善知識能作佛事示教利喜令入阿耨多羅三藐三菩提大王當知善知識者是大因緣所以化導令得見佛發阿耨多羅三藐三菩提心大王汝見此二子不此二子已曾供養六十五百千萬億那由他恒河沙諸佛親近恭敬於諸佛所受持法華經愍念邪見衆生令住正見

彼佛知莊嚴語意潛通那畔欲露本因故

以二如是應之如汝所言下是將莊王之語廣明而已謂凡世間一切善心男女以一生發起善心爲因世世值善知識爲緣況爲知識者能種種方便漸漸引攝至於菩提故曰能作佛事示教利喜也此是通論一切爲善知識者皆如是也大王當知下方說莊王今日因緣前來王叙二子神變是得佛知而未明佛見故今與發明使王亦得是見所謂汝見此二子不而此二人非但一生修習此經爲善知識已曾於恒河沙劫供養諸佛受持此經爲愍念邪見衆生令住正見而廣爲善知識也天台云佛讚知識有大義能作佛事是外護知識示教利喜是教授知識化導見佛是同行知識令入菩提是實相知識^卅十歎佛

自誓

妙莊嚴王卽從虛空中下而白佛言世尊如來甚希有以功德智慧故頂上肉髻光明顯照其眼長廣而紺青色眷問毫相白如珂月齒白齊密常有光明唇色赤好如頻婆果爾時妙莊嚴王讚歎佛如是等百千萬億功德已於如來前一心合掌復白佛言世尊未曾有也如來之法具足成就不可思議微妙功德教戒所行安隱快善我從今日不復自隨心行不生邪見憍慢嗔恚諸惡之心說是語已禮佛而出

佛九

三六

前來升空讚二子神智是始契法身而得佛知今承彼佛述其高行則不住真際復從空下而讚佛發願是已得佛見既得具佛知見所以廣讚一體三寶也知音云如

來甚希有下讚佛法身頂上肉髻下讚佛
報身畧明三十二相之五一頂髻二目廣
三白毫四齒密五唇好如是等下總讚八
十種好及諸功德也已上通讚佛寶於如
來前下讚法寶明由二子之力故令已證
得慈悲喜捨乃至三十七品所謂具足成
就又云不可思議等者是無量法門悉皆
明了得佛所得故曰微妙功德也教戒所
行者即依教修行得妙法之實證所以得
安隱快善也此皆通讚法寶我從今日下
歎已由見佛聞法而成僧寶發願永斷一
切大小隨眠煩惱也此文通具四弘誓願
讚佛是佛道誓成讚法即法門誓學歎僧
乃煩惱誓斷然成佛必當度生故以攝衆
生誓度也禮佛而出者乃出離本處而徧

入他處即有興慈運悲之想非辭佛而歸
國也頻婆此云相思果色丹而潤已上所
化利益已竟

⑤五結會古今分二⑥一正以結會古今
佛告大衆於意云何妙莊嚴王豈異人乎今
華德菩薩是其淨德夫人今佛前光照莊嚴
相菩薩是哀愍妙莊嚴王及諸眷屬故於彼
中生其二子者今藥王菩薩藥上菩薩是
知音云此正爲會通今古前王者而今菩
薩古今無二人也蓋見華德之問妙音因
果彼此雖殊夫婦父子所受持之妙法則
同也○佛前光照天台謂佛前放光東召
光照妙音之身故也言莊嚴相者謂妙音
有無量百千功德莊嚴其身光明照耀諸
相具足故是即指妙音菩薩也於彼中生

者卽指淨光莊嚴國中⑤二再得結歎藥王

是藥王藥上菩薩成就如此諸大功德已於無量百千萬億諸佛所植衆德本成就不可思議諸善功德若有人識是二菩薩名字者

一切世間諸天人民亦應禮拜

知音云此益見陀羅尼品中與持妙法者之陀羅尼爲六十二億恒河沙等諸佛所說之不虛也故曰已於無量等若人下有況顯意謂但識名字者尚爲一切天人之所敬禮況能學二大士之持經豈不蒙諸佛所護而與之說陀羅尼耶

⑥六聞品進道

佛說是妙莊嚴王本事品時八萬四千人遠塵離垢於諸法中得法眼淨

妙樂云法眼淨有云初果然王及夫人與八萬人等皆持此經皆當作佛豈聞品者得小果耶名同義殊須善斟酌當須判爲六根清淨法眼位耳卽七信已上知音云佛五眼中法眼淨爲十地菩薩所具明莊王本事轉邪流通竟

妙法蓮華經授手卷第七之四

極九

三十

音釋

型 奚經切音 瘳 丑鳩切音 簞 烏果切音 袞 音 伺 刑模範也 瘳 抽病痛也 簞 音駁 袞 音款 同 卑 故勞切 窵 音款

妙法蓮華經授手卷第七之五 極十

清楚衡雲峰沙門智祥集

普賢菩薩勸發品第二十八

品節云此品顯以行成德乃現身面言說
加持也此經以智立體故文殊發起以行

極十

成德故普賢成終而明入佛知見也釋普
賢有二意一道前屬因二道後屬果謂行
彌法界曰普隣極亞聖曰賢此在等覺屬
因又稱真法界曰普彌綸萬化曰賢此在
妙覺屬果也以此普賢乃法界之全體爲
毘盧十身之願身故菩薩依此信解修行
而還證此體所謂無不從此法界流無不
還歸此法界也然菩薩因圓至等覺已而
復須加持者是必假果接乃得入妙故此
菩薩乃爲證入之終而以普賢願力守護

必得是經也所以菩薩必問云何能得是
經而如來告以四法成就也然此四法正
與起信論信成就中發三種心義實相同
論云一者直心正念真如法故此中云諸
佛護念也二者深心樂集一切善法故此
中謂植衆德本也三者大悲心欲拔一切
衆生苦故此中謂救一切衆生也又云如
是信心成就得發心者入正定聚此中所
謂入正定聚也然此品顯證而言信成就
者謂初以文殊發信依信生解依解發行
行起解絕故爲證入則此證入亦卽信之
所成就也所謂發心究竟二不別如是二
心先心難故須藉普賢終以四法必得是
經耳論依最初發心說此乃約成就說故
論在初而經居後也凡有持是經者普賢

卽自現身而謂現身而言說加持也由有三種加持乃可證成得果之象故判此品爲入佛知見無疑矣別行疏云梵語三曼多跋擦羅此云普賢準本經自在神通曰普威德名聞曰賢乃十方三世一切諸佛

極十

二

之長子也故經云一切如來有長子彼名號曰普賢尊若準彼疏有人法五訓法有二一體性周徧曰普隨緣成德曰賢二一卽一切曰普一切卽一曰賢此二正同此經之妙法也人有三一一位前信住行向善薩曲濟無遺曰普隣極亞聖曰賢正同此經諸新得記菩薩二當位十地等覺菩薩德周法界曰普至順調善曰賢正同此經八十萬億那由他發願持經菩薩三位後謂已成佛竟行德周脩障累永祛上無所

求唯不捨悲願務在度生隱實現權果無不極曰普不捨衆生曰賢正同此經八品流通分當機諸大菩薩也故以普賢爲流通之終勸謂勸佛重宣四法發謂發心說咒護持成就四法得此經之人故曰普賢

勸發品此經以彌勒文殊爲開章觀音普

賢爲奉行明妙法慈智爲始悲行爲終○

又上判流通爲三從分別功德品半已後

三品半舉經力大以勸流通藥王品下五

品舉菩薩化道力大以勸流通此品舉普

原十

三

賢誓願力大以勸流通也④三普賢勸發

自行流通分四⑤一經家叙其發來

爾時普賢菩薩以自在神通力威德名聞與

大菩薩無量無邊不可稱數從東方來所經

諸國普皆震動兩寶蓮華作無量百千萬億

種種技樂

此明發來之相要解云普賢統事法界圓具萬行卽事而真其應身無乎不在且於法會之終示從東方來者東方震地之所出也以法會至此因地智圓果地覺滿十地妙圓之行脩則進修之功已盡妙覺之體已成於是依無功用行出震利物故示從東方來華嚴過十一地說佛海功德既終卽說如來出現利世間行卽此意也以不離常行無爲應物故曰自在神通以德無不徧名無不聞故曰威德名聞與無邊菩薩俱來者示萬行圓攝無盡也所經諸國下妙音來儀亦兩華作樂皆所以彰顯妙行宣流法音也

又與無數諸大龍夜叉乾闥婆阿修羅迦樓

羅緊那羅摩睺羅伽人非人等大衆圍遶各現威德神通之力

上叙同來菩薩是本眷屬與普賢同行則自在神通威德名聞無不同也今叙八部乃爲外護而曰各現威德神通力者是叙其所具之德亦有斯行也此皆是普賢神通三昧所致

到娑婆世界耆闍崛山中頭面禮釋迦牟尼佛右遶七匝

○此叙見佛三業恭敬之儀西域以圓遶

經云

四

爲至敬今言七匝者表信住行向地等妙七位圓行歸如如理②二問答勸發行相分二③一請問勸發又二④一普賢問

白佛言世尊我於寶威德上王佛國遙聞此娑婆世界說法華經與無量無邊百千萬億

諸菩薩衆共來聽受惟願世尊當爲說之若
善男子善女人於如來滅後云何能得是法
華經

此普賢陳所事佛與所居之界爲陳請之
由也知音云初開法會白毫相光自西照
東今法會畢普賢菩薩從東至西示一大
事因緣相首尾也遙聞者心聞洞十方不
爲形隔業聞序正二分經已惟願下承流
通分中五品言謂現在過去持經者既如
藥王等或以苦行或以妙音或以陀羅尼
或以妙莊嚴無非普門自在之業是爲極
難之事教未來世人云何能得極省力易
簡之法以持此經是我普賢與衆菩薩共
來聽受之意也故云如來滅後云何能得
等華嚴會終普賢爲善財說十大願此經

極十

五

會畢普賢請佛說其四行二經始終如出
一轍要解云前之所問唯受持讀說而已
獨此問云何能得是欲人人自證自得也
④二如來答分三④一總標四法
佛告普賢菩薩若善男子善女人成就四法
於如來滅後當得是法華經

此標陳四法爲得法之本也○得者謂得
此七卷經文受持讀誦卽得開悟佛知見
也經云若有聞法者無一不成佛又無論
佛現在滅後但聞一偈一句者皆得與記
④二別開四行

一者爲諸佛護念二者植衆德本三者入正
定聚四者發救一切衆生之心

知音云此別釋四法一佛護念者夫末世
之人去佛既遠安能得其護念所謂護念

者由行人發菩提心則得法身佛所護念也法身者即吾人本有之心性既見是心時刻照管即是護念然修此行須以大慈悲爲室若欲以慈與衆生樂以悲拔衆生苦惟見證法身者能耳二植德本者吾人既得法身已即是佛何須更植德本也縱植又以何爲德本也然行人雖得法身不植德本如有地不種則爲無用之印是以理性具苟不廣修六度必缺莊嚴亦不得報化圓滿而度生亦有限矣是故見法身後更須培植萬行也且涉行既深魔障滋廣必當以柔和忍辱衣爲植德之本則魔業無能爲礙矣三入正定者既培六度禪定在中又奚用入正定耶然非六度外別有正定但修德本於忍辱苟不達諸法空

座則忍難持久是故見得一切法空以爲正定則忍而無忍諸度聚矣四救一切衆生者既定聚法空則已與衆生皆空又奚用發救生之心也約性而觀自他本空約相而言衆生無盡苟不發救度之心則懈怠爲業願力不克果海何圓況等覺菩薩尚用發心經云然後以不懈怠心爲諸菩薩及四衆廣說是經也應知具前三法始能發後一心發後一心始能成前三行也未世行人欲得此經須行此四法如目足相資缺一不可故後始云成就四法必得是經也

⑤三總結成就

善男子善女人如是成就四法於如來滅後必得是經

此結成末世中人若圓四行即便爲得此經矣大藏云所謂成就四法必得是經者如藥王得此而然身妙音得此而化座觀音得此而普應莊王得此而轉邪普賢得此而勸發是皆成就此四法者之驗也○

補

七

問此與四安樂行同別耶答四安樂是說經之法此是持經之方總是二利之德亦同亦別也④二普願勸發分二⑤一護人又分六⑥一攘其外難而彰總別又二⑦一總

爾時普賢菩薩白佛言世尊於後五百歲濁惡世中其有受持是經典者我當守護除其衰患令得安隱使無伺求得其便者

此總中言除衰患得安隱則如觀音之能救七難也衰約形貌枯悴生計蕭條言患

約身心病苦事端侵害言故知遠來勸發意不在當會蓋爲後五百歲時愈下而信愈淺聖愈遠而邪愈興若非普賢之神力加持其不退失者鮮矣若不爲威力擁護必爲衆邪留難者多矣故此品中多叙現身面言說以堅受持讀說者之弱力是知末世有能堅人信力勸進深修不使墮諸見稠林者得非普賢威神之所被哉⑧二別

若魔若魔子若魔女若魔民若爲魔所著者若夜叉若羅刹若鳩槃荼若毘舍闍若吉蔗若富單那若耆陀羅等諸惱人者皆不得便此於攘難中單叙魔鬼者由諸魔鬼愛戀塵勞行人持此妙法本欲出離以定力深重故多招致也況魔鬼多伺過隙倘行人

一時忘照縱有滲漏一爲菩薩護念諸鬼
雖惡亦不便行惱亂事也。常陀羅云厭禱
鬼

⑤二教其內法而明誦習分四⑥一行立
讀誦

是人若行若立讀誦此經我爾時乘六牙白
象王與大菩薩衆俱詣其所而自現身供養
守護安慰其心亦爲供養法華經故

末世行人若能行立讀誦此經是念念常
存必爲菩薩之所守護故曰我爾時等也
象表如理白者純潔精真也六牙表六
度法王者卽能統攝萬事萬理成普賢行
也菩薩不惟守護行人而又曰供養者由
行人受持妙法已爲十方諸佛之所護念
故供行人卽供佛與經也然行人旣爲佛

攝十

八

護念菩薩又發心守護此節卽成就一者
諸佛護念也⑦二端坐思惟

是人若坐思惟此經爾時我復乘白象王現
其人前其人若於法華經有所忘失一句一
偈我當教之與共讀誦還令通利爾時受持
讀誦法華經者得見我身甚大歡喜轉復精
進以見我故卽得三昧及陀羅尼名爲旋陀
羅尼百千萬億旋陀羅尼法音方便陀羅尼
得如是等陀羅尼

前行立中雖蒙現身守護所謂安慰其心

攝十

九

者以行人功力未純不免打失故菩薩現
身守護使外境不入令得安穩修習離諸
苦患爲菩薩大悲拔苦也今於靜定中思
惟此經卽是入理而言我復乘象王者謂
前於行立處已得見身而今於定中又現

其身與共讀誦必使行人得無限樂生無限喜由此因緣故得三昧及陀羅尼得三昧是定深陀羅尼是慧具此爲菩薩大慈與樂也旋陀羅者要解云由得此經故卽見普賢常行之體於一切法返本還源名旋陀羅尼然得總持之體既能旋末歸本卽復旋體入用於一塵一法一切時處方便利生逆順自在名百千萬億旋陀羅尼此卽普賢徧一切處之行也前旋爲轉物所謂旋假入空後旋爲應物所謂旋空入假轉物爲體應物爲用若未能轉物而遽然應物則爲物所轉矣然則二旋異用而相需也法音方便者卽隨應說法之行轉復精進卽成就第二植衆德本也卽得三昧是成就第三入正定聚也⑤三三七精

進

世尊若後世後五百歲濁惡世中比丘比丘尼優婆塞優婆夷求索者受持者讀誦者書寫者欲修習是法華經於三七日中應一心精進滿三七日已我當乘六牙白象與無量菩薩而自圍遶以一切衆生所喜見身現其人前而爲說法示教利喜亦復與其陀羅尼咒得是陀羅尼故無有非人能破壞者亦不爲女人之所惑亂我身亦自常護是人

此段總束前未得者令得未解者令解未

極十

十

修者令修未證者令證也於受持前加求索是未得令得也於讀誦後加書寫是未解令解也前於行坐中思惟未得者今教限三七一心精進是未修令修也至三期終現身說法示教利喜是未證令證也

前兩度但曰乘象現形此復叙與無量菩薩及現衆生所喜見身者是行人功深力極一心精進之所致也一切衆生義該九界喜見身者卽十身相海淨妙色身也三處論現身必曰乘象是體不離用之謂前言魔鬼不便此曰非人女人益見其爲初心信樂之人作守護也然魔鬼無定力者不能引動所謂賊不打貧家下曰我身自護是人者卽初心行人也所以菩薩勸發之心後後無盡誠爲恩大難酬④四

正與說咒

惟願世尊聽我說此陀羅尼咒卽於佛前而說咒曰

阿檀地 檀陀婆地 檀陀婆帝 檀陀鳩舍隸 檀陀修陀隸 修陀隸 修陀羅婆

極十

十一

底 佛陀波羶福 薩婆陀羅尼阿婆多尼

薩婆婆沙阿婆多尼修阿婆多尼 僧伽

婆履义尼 僧伽涅伽陀尼 阿僧祇 僧

伽婆伽地 帝隸阿情僧伽兜畧阿羅帝波

羅帝 薩婆僧伽地三摩地伽蘭地 薩婆

達磨修波利刹帝 薩婆薩埵樓陀憍舍畧

阿菟伽地 辛阿毘吉利地帝⑤三覆以神

力而使聞持

世尊若有菩薩得聞是陀羅尼者當知普賢神通之力若法華經行闍浮提有受持者應作此念皆是普賢威神之力

菩薩旣自現身守護則一切外難無容可入惟恐行人自心魔礙隱作障故復說咒使誦此咒則沉業亦殞矣今言菩薩得聞者卽指修行四法受持此經之人謂能

聞此咒須知卽爲普賢神通所護若非普
薩神通威力咒尚無有聞復何生故今日
得聞實菩薩力也又言此經行闍浮提有
受持等者闍浮處極濁人極惡所以普賢
從寶威德上王佛國入此娑婆爲勸發者

意在佛滅後之最後五百世乃良知將泯
國土將壞之時一切佛法俱不出現若此
時有妙法存有能信持豈非菩薩神力之
所在耶故曰皆是普賢威神之力

④ 四特示勝因而進修持

若有受持讀誦正憶念解其義趣如說修行
當知是人行普賢行於無量無邊諸佛所深
種善根爲諸如來手摩其頭

此明修行此經之功德也知音云不出六
種法師義一受持二讀誦三正憶念謂因

極十

十二

讀誦純熟而得正心默念也要解云持經
之要在正憶念蓋憶不正則雜想變亂念
不正則邪習汨擾欲成深行亦難矣四解
義趣謂因正憶思惟則義理炳現也五如
說而行乃依理起行以上皆行人之功當

知下方明其德亦有二一因如說而行則
此人不違法相卽普賢行也二因具足修
行此人而無疲厭則知於無量佛所深種
善根也三由具足修行卽是真因故感果
佛以手摩頭而安慰其心也此約具行五
法所感現世之功德如是

⑤ 五復示近果而明利益

若但書寫是人命終當生忉利天上是時八
萬四千天女作衆伎樂而來迎之其人卽着
七寶冠於采女中娛樂快樂

知音云此明不能全具五種但能書寫此人命終未來功德卽得生欲界第二天受諸欲樂其樂有三一天樂來迎二著七寶冠三采女娛樂△問妙法有不思議勝功旣得具書此經則應爲諸聖冥加當令至

極十

十三

不生滅解脫之場胡爲使生欲界於采女中受諸欲樂天福若盡未必不墮也答此亦隨因感果非經力欲使爲此樂也且書寫者由不能受持讀誦無正憶思惟但聞知此經功深力重或爲宿習濃厚不能捨諸世間恩愛祇好書寫而已由此功力於世樂中而增天樂可謂增上緣也其實爲下文作校量章本耳

何況受持讀誦正憶念解其義趣如說修行若有人受持讀誦解其義趣是人命終爲千

佛授手令不恐怖不墮惡趣卽往兜率天上彌勒菩薩所彌勒菩薩有三十二相大菩薩衆所共圍遶有百千萬億天女眷屬而於中生有如是等功德利益

知音云何況二字是以劣校勝也謂書寫一種其功德尚乎如此則全具五法其得勝報可知也功德亦三一命終爲千佛授手勝前但天女相迎也授手者提接之義二無墮惡趣恐怖返顯忉利樂盡尚有墮惡之怖也三由千佛接引得生彌勒內院親近補處之尊故卽往兜率也三十二相大菩薩者乃與慈氏如來爲同行侶天女百千者乃侍從慈氏如來者非同忉利之爲欲樂也有如是等是總結廣畧功德以勸發修持也如是者指前所出之相等者

等於未舉之功德猶不可量也此節即成就第四發救一切衆生之心以親近補處之尊即能發是心也④六總結一心而使修行

是故智者應當一心自責若使人書受持讀

極下

十四

誦正憶念如說修行

此總結修持也舉智者謂重在一心也心若不一豈能致普賢而爲守護是知此經非智者不能書持非智者不能憶念所以華嚴經中亦顯非智者不能剖微塵而出大千經卷也上節護人已竟

④二護法

世尊我今以神通力故守護是經於如來滅後闍浮提內廣令流布使不斷絕此以神力守護佛法也闍浮爲佛發心修

因得果之土故雖濁惡利根亦衆其中衆生不信則已信則必至成佛所謂蓮華不生淨地卑濕淤泥乃生之意也故經中每言闍浮提流通其經意在於此問答勸發已竟⑤三述發久修實證分二⑥一述

護法

爾時釋迦牟尼佛讚言善哉善哉普賢汝能護助是經令多所衆生安樂利益汝已成就不可思議功德深大慈悲從久遠來發阿耨多羅三藐三菩提意而能作是神通之願守護是經我當以神通力守護能受持普賢菩薩名者

極下

十五

天台云如來舉勝述成其劣增進行者勇銳弘宣今先述護法謂汝能如是外多利益內積慈悲又久劫已來作如此護則汝

之功德無以加矣凡有衆生持汝名者我亦以神力守護是人爲彼堅其信力使法有所賴也④二述護人分五⑤一述身教法

普賢若有受持讀誦正憶念修習書寫是法華經者當知是人則見釋迦牟尼佛如從佛口聞此經典當知是人供養釋迦牟尼佛當知是人佛讚善哉當知是人爲釋迦牟尼佛手摩其頭當知是人爲釋迦牟尼佛衣之所覆

此述其示身教法也天台云然此六種得法之人尚乎見我萬德果身豈獨見汝乘六牙象耶尚爲佛口讚手摩以衣所覆豈獨爲汝以陀羅尼護之耶知音云此節印證當機道一者爲諸佛護念

④二述舉勝因

如是之人不復貪著世樂不好外道經書手筆亦復不喜親近其人及諸惡者若屠兒若畜猪羊鷄狗若獵師若街賣女色是人心意質直有正憶念有福德力是不爲三毒所惱亦不爲嫉妬我慢邪慢增上慢所惱是人少欲知足能修普賢之行

知音云此節承上明末世六種法師得如佛現在護念故成第二植衆德本以結文修普賢行是衆德之本其德有六一不貪世樂德世樂卽財色名食睡之五欲也二不好外道人法德法卽經書手筆人卽外道六師也三不親惡者德惡亦有三一畜猪等二獵師三女色街賣者卽開彰行市也四正直福力德五不爲根本大小睡眠

所惱德三毒謂貪嗔痴根本惑也屬鈍使
嫉妬小隨也我慢等大隨也屬利使於七
慢中舉三慢以攝其餘六知足德謂於五
欲中隨分受用也次下總結若能具此六
德卽名能修普賢之行也④三述示近果

極十

十六

普賢若如來滅後後五百歲若有人見受持
讀誦法華經者應作是念此人不久當詣道
場破諸魔衆得阿耨多羅三藐三菩提轉法
輪擊法鼓吹法螺兩法雨當坐天人大衆中
師子法座上

○通節印證末世六種法師當得菩薩護
助使人信其不久成佛冥照三者入正定
聚也以詣道場等是正定聚處故亦結法
說一周之文以轉法輪等是序品方便品
文殊答彌勒之文故上節修普賢六種法

極十

十七

師具大因也此節得阿耨菩提等六種法
師具大果也

普賢若於後世受持讀誦是經典者是人
不復貪着衣服卧具飲食資生之物所願不虛
亦於現世得其福報

○此印證得經者爲菩薩護助直應恭敬
獲福不宜輕毀致罪以成四者發救一切
衆生之心也故其人雖不貪世樂然於資
生之物有所願求亦必不虛而現世得其
福報也④四述攘外難

若有人輕毀之言汝狂人耳空作是行終無
所獲如是罪報當世世無眼若有供養讚歎
之者當於今世得現果報

此用善惡相對讚毀互形先明毀者之罪
謂無知者不知此經圓具十法界因果返

謂受持者爲狂人言彼空作持經之行終不能得成就妙果由此之言失佛知見故報彼世世無眼也下明供讚者得福凡見持經者不貪衣食等愈興讚歎轉加供養則此人雖未持經而知此經深利故其償報亦同持經者得現生果報也

若復見受持是經者出其過惡若實若不實此人現世得白癩病若輕咲之者當世世牙齒疎缺醜唇平鼻手脚繚戾眼目角疎身體臭穢惡瘡膿血水腹短氣諸惡重病

此舉賢不賢行人俱不可毀設於未持已前有諸過咎一持此經如湯銷冰卽實有過以持經故其善大焉或持經者有過無過若於他人前非毀是障持者之莊嚴法身所以報得癩病也又或輕弄叱咲持經

恆十

十八

之者感世世牙齒疎缺等然一輕咲而致罪如此者由一根舉而諸根隨故如是報也手繚脚戾乃卷曲不伸也眼角疎者瞳子不正也臭穢者無知見香也水腹者由空腹高心無顧無忌也短氣者由輕咲之聲無狀無畏也諸惡重病總結一切不善之業⑤五述信功德

是故普賢若見受持是經典者當起遠迎當如敬佛

此囑敬信受持者也必曰見而遠迎敬而如佛者以持經行人有諸佛菩薩守護而又能發救衆生之心是則因果二佛齊在焉得不如是迎敬耶知音謂此上乃結喻說一周之文以喻說後多明罪相故明久修實證已竟

⑤四述發聞者利益分二⑥一聞品得益說是普賢勸發品時恒河沙等無量無邊菩薩得百千萬億旋陀羅尼三千大千世界微塵等諸菩薩具普賢道

知音云此節經家叙置聞品得益之衆結

極十

九

因緣說一周以恒沙衆及微塵衆各具佛知見之因遇佛說普賢道爲緣故證旋陀羅尼或具普賢道各隨機契也直指云獨聞此品而獲益者衆是大法已終之境界也言無量得旋陀羅者當是得十地果微塵等具普賢道當是得佛果位所以言道而不言行也知音以此三段結盡三周者乃了完如來出世爲一大事因緣之案蓋三周事畢卽說法師品以流通焉雖結其迹而本門之大事亦具其中矣如此結歸

不無其見⑦二通結聞經

佛說是經時普賢等諸菩薩舍利弗等諸聲聞及諸天龍人非人等一切大會皆大歡喜受持佛語作禮而去

說是經者卽前三大分本迹二門皆說已竟此是結所說之教次結能聽之機舉普賢以等該文殊彌勒藥王觀音及無量大菩薩是本門之衆舉舍利弗卽攝目連須菩提富樓那等一切聲聞是迹門之衆亦攝盡三乘及四衆等也末舉八部收後是舉無不盡則六道法界俱攝盡無餘矣然序衆中詳演此結處畧標則詳畧見矣復舉一切大會則又該此界他方一切本迹三乘及人天等無不結盡舍利弗仍存聲聞名者乃依今迹位而結以便統攝諸聲

聞也皆大歡喜一句是統收在會此界他
方聖凡大衆得開示悟入佛知見之慶幸
也其喜踴應有無量總不出全經本迹兩
門之利益也受持佛語者受卽領承拜受
持卽執守奉行佛語者卽前迹本二門正
說流通之語也作禮而去者一則儀法之
所當行聞教之後必應禮謝去者乃各歸
一所如前序衆中有恒沙菩薩來有長者
居士來有天龍八部來前既有來今必有
去二則禮者盡其誠敬也旣聞三周開顯
本迹全彰實相一乘朗然開悟而感謝之
私無以爲喻但只作禮而已去者卽各各
依教修行歸自本心所謂一真寂滅場地
亦古謂一念萬年去一條白練去冷秋秋
地去古廟香爐去如是去者可謂中中流

佛十

十

入也直指云先德言一法若有毘盧墮在
凡夫萬法若無普賢失其境界斯語正符
此經之旨蓋此經總一代時教徹底爲九
界衆生不離當處全身證入但爲三乘紐
於權小等地猶墮偏枯故首以文殊大智
掃蕩羣疑揭轉八識心王令根身器界當
體圓明直下開佛知見記授剎國莊嚴於
是以法師品統收在會則九界該羅同入
信位矣正信旣凝乃於寶塔品圓會三身
四土今古一如復舉提婆達多品重明心
佛衆生三無差別則四智融而十信滿矣
信滿則住故繼以持品畧明十住之相由
住而行故繼以安樂品深示十行良模而
迹門之能事于焉畢矣自湧出至隨喜乃
顯本門真常湛寂彌勒頓破迹疑聲聞同

佛十

王

登實際遂說法師功德品以明十回向位以回真向俗遂得六根清淨以上爲衆廣示三賢因行而如來復自舉爲常不輕菩薩時所行行住向地等妙二覺次第因行節目以示新記令其觀光而入也大因必有大果故現十種神力以結如來自覺聖智因果一周之大案遂於焉囑累流通復爲新記者重示十地行相故舉藥王本事品始登初地而燃身終至八地而燃臂則俱生我法二執謝矣藥病兩亡入法師位故說妙音來往品以示九地十地行繇發真如大用紹繼聖種就中從初地至十地步步是捨俗歸真至觀音普門品乃示等妙二位回真向俗因行之相至此回視迹門法師品十信滿心首尾如如於佛則一

大事因緣顯矣於衆則一生叅學之事畢矣時爲凡情雖盡聖解未忘故以陀羅尼品蕩滌五十五位修證總歸如來秘密妙輪俾乎迷悟雙超始末同泯而復舉莊王父子一段光明總顯全經大旨妙在當人一念之中四智圓明十方坐斷一生取證更不移易末上舉普賢大行成就四法該括因果以爲最後流通大結允矣妙法不可思議自三周開權顯實二乘有學同成正覺繼復開迹顯本九界衆生共證真常語因果則三世一如論修證則前後際斷圓融行布月皎空沉行布圓融古今一色正所謂出息不涉衆緣入息不居陰界常轉如是經百千萬億卷斯爲法華妙旨耳妙法蓮華經授手卷第七之五

音釋

擦

初晏切
音察

遽

巨御切
音卒也

繚

音了
狀也

踈

即代
切音

徠

邪

叱

咲

咲

開

口

解

顏

貌

叱